

Leeter masa Pawl ma wuzlala  
 ngeeme a  
 Kwarinti hay  
 Mey da ray  
 Leeter ngeeme ngada Kwarinti hay

Pawl a wuzlala leeter ngada ndohay daa mecəmey-ray nga Yesu daa berney nga Kwarinti na, daa masa anga daa berney nga Efez. (SNM 18.1-21).

Kwarinti na, ara berney mahura daa hwayak nga Gerek hay. Berney aha aa da mey-bəlay mahura. Anda keɗe daa berney a, ndohay ga ma samawa daa hwayak hay mekele mekele daha, a ragadam ngada kuley hay mekele mekele may. Menjey ata na, maaya ba. Cek hay maaya ba masa ata ma kamara na, fa nəsta ndohay daa mecəmey-ray nga Yesu. Maja ngeene, Pawl a wuzlalatar leeter hay məfaɗ. Da wuzlah leeter hay a na, cew ata daha daa Ɗerewel nga Gazlavay haa wure keɗe, cew hay may taa zəɗam sem.

Pawl a wuzlala leeter e maja a cənda na, da wuzlah ndohay daa mecəmey-ray nga Yesu, mey mekele mekele daha: fa təram vaw da wuzlah ata (fasəlawal 1 haa 4), fa kam cek malamba (fasəlawal 5), fa wudam vaw da wuzlah ata (fasəlawal 6), mey da ray meley ngwas (fasəlawal 7), mey da ray menjey da wuzlah ndohay ma ta kuley hay, ma zəmamara aslaw nga kuley a (fasəlawal 8 haa 10), mey da ray mezəmey ɗaf nga sərfeɗey meməcey nga Yesu (fasəlawal 11), mey da ray gəɗaŋ nga Mesəfney nga Gazlavay masa Gazlavay ma vəlda a ndaw a, ndaw a, nga key sləra mekele mekele daa mecəmey-ray nga ndohay

nga Yesu (fasəlawal 12 haa 14), leŋ mey da ray ndəhay nga Yesu ma da sləkdamawa daa meməcey (fasəlawal 15).

*Daa leeter e keɗe* na, mey mekele mekele daha nga vəley gədaŋ a ndəhay:

*Mewuɗey-vaw* (fasəlawal 13)

*Mey da ray* gədaŋ masa Mesəfney nga Gazlavay ma vəldatara a ndəhay anŋa hay nga key sləra anŋa. (fasəlawal 12 haa 14)

### *Mecey-har*

<sup>1</sup> Ara yah Pawl ma wuzlalakwa leeter keɗe, yah ndaw masa \*Gazlavay ma wala nga key \*ndaw-meslərey nga \*Yesu \*Kəriste. Ya wuzlalamara na, ala ta mələma aləkwa Sawsten.

<sup>2</sup> Ya wuzlalamara leeter keɗe ngada akwar, ndəhay daa \*mecəmey-ray nga ndəhay nga Yesu masa daa berney nga Kwarinti, akwar masa Gazlavay ma walakwar wal amba ka njam macəmkaya ta Yesu Kəriste. A walakwar bama ta ndəhay tabiya masa fa dərmar dangay a Bay aləkwa Mahura Yesu Kəriste, kwa daa wura daa wura. Anŋa na, Bay ata Mahura, asaya, anŋa na, Bay ala Mahura may.

<sup>3</sup> Anja Papa aləkwa, Bay Gazlavay, ta Bay aləkwa Mahura Yesu Kəriste nga pəsmakwar mey, asaya, nga njadamakwar daa zazay.

*Mey da ray maaya nga Gazlavay da ray* ndəhay anŋa hay daa berney nga Kwarinti

<sup>4</sup> Ya fa kar suse a Gazlavay aɗaw mandaw mandaw maja maaya anŋa ma pawa salay a ray akwar ta fa Yesu \*Kəriste. <sup>5</sup> Daa masa akwar macəmkaya ta Yesu Kəriste na, Gazlavay ta kakwar maaya la ga amba ka kamar sləra.

Anda keɗe, ta vɛlkwar gɛɗanɗa ɗga wuzey mey anɗa a ndɔhay la, asaya, ta vɛlkwar lenɗes la ɗga cɛnda mey anɗa hay tabiya. <sup>6</sup> Mey da ray Kɛriste masa ala ma wuzdamakwara na, aa daa mevel akwar mandaw mandaw. <sup>7</sup> Anda keɗe, akwar masa fa sɛkwamara Bay alɛkwa Mahura Yesu Kɛriste ma da wuzwa vaw na, Gazlavay ta vɛlkwar gɛɗanɗa la ɗga key slɛra wura wura tabiya. <sup>8</sup> Ara Gazlavay ma da vɛlkwar gɛɗanɗa anɗa ɗga nɗey maaya fa mey anɗa haa pas masa Bay alɛkwa Mahura ma da vɛhwa ɗga key sariya amba a hɔtfakwar manjar mebɔrey. <sup>9</sup> Gazlavay ta zɛlkwar la amba ka nɗam macɛmkaya ta Bɔzey anɗa, Yesu Kɛriste, Bay alɛkwa Mahura. Gazlavay na, cek masa aa ma lɔvey a ka la na, a ka la fara fara.

**Ndɔhay** ɗga Yesu da Kwarinti a wudkam ɗay

<sup>10</sup> Mɛlma aɗaw hay, ya fa kakwar ambaw ta mezɔley ɗga Bay alɛkwa Mahura Yesu \*Kɛriste amba ka cɛmam ɗay. Ka da wudkam ɗay da wuzlah akwar ba. Nɗam macɛmkaya ta mevel letek, ta mewulkey letek. <sup>11</sup> Mɛlma aɗaw hay, yaa guzley anda keɗe na, maja ndɔhay daa sɛkway ɗga Kelɔwe ta kadamiwa la, a lɔvmaya, akwar fa tɔram vaw ta tɔrey da wuzlah akwar. <sup>12</sup> Ehe, jɛkam slɛmay fa cek masa yah ma wudɗey ɗgaa guzlkwar. Akwar ta mewulkey wal wal da wuzlah akwar. Ndɔhay siya a lɔvam a sɔpam na, yah, Pawl. Siya hay a lɔvam a sɔpam na, Apalaws. Siya hay a lɔvam a sɔpam na, \*Piyer. Siya hay mekele saya a lɔvam a sɔpam na, Kɛriste. <sup>13</sup> Ka wulkam na, Kɛriste anɗa mawunkakaya weewe daw? Yah, Pawl na, ya ta mɔcey la fa hwadam mazlanɗalɔkaya maja

---

1:5 1.5 2Kwr 8.7 1:7 1.7 2Tes 1.7; Tit 2.13 1:8 1.8 Fɔl 1.6; 1Tes 3.13; 5.23 1:9 1.9 10.13; 1Tes 5.24; 2Tes 3.3 1:10 1.10-11 3.3; 11.18; 2Kwr 12.20; Ef 4.2-6; Fɔl 2.2; Jan 17.21-23 1:12 1.12 3.4; Apalaws: 3.5-6, 22; 4.6; 16.12; SNM 18.24; 19.1; Piyer: 1Kwr 3.22; 9.5; 15.5; Gal 2.9-11-14; 2Kwr 10.7

akwar daw? Akwar ta hõtam \*baptem ta mezøley aƔaw la daw?

<sup>14</sup> Ya fa kar suse a Gazlavay maja ya ta key baptem ngada ndaw da wuzlah akwar daa ba, ama si ngada ata Kørispus ta Gayus daada gway. <sup>15</sup> Anda keƔe, kwa ndaw pal fa da løyey ta høtey baptem la ta mezøley aƔaw na, daa ba. <sup>16</sup> A', fara, ya ta katar baptem la ngada ata Estefanas ta ndøhay da way anga. Ayøwa, da ya ta key baptem ngada ndøhay mekele la kwa, ya søra ba. <sup>17</sup> Køriste a slørdiwa na, nga katar baptem a ndøhay ba, ama a slørdiwa nga wuzey \*Mey-maaya-mawiya. Daa masa ya fa wuzda Mey-maaya-mawiya na, ya wuzda ta mewulkey nga ndaw-magøɗan ba. Ya ka anda keƔe na, amba memøcey nga Køriste da ray hwadam mazlanɗalakaya a tøyey nga cek nga tede ba.

*Yesu Køriste a wuzdørwa gøɗan ta lenɗesl nga Gazlavay*

<sup>18</sup> Ndøhay masa ma zlanɗaƔam sem daa cøved' nga Gazlavay na, a wulkam mey da ray memøcey nga \*Køriste fa hwadam mazlanɗalakaya na, ara mey nga tede. Ama ngada aløkwa, ndøhay masa Gazlavay ma løhdata cay na, ya sørkwa memøcey nga Køriste a wuzwa gøɗan nga Gazlavay nga løhdata ndøhay. <sup>19</sup> Mey nga Gazlavay a løyey:

«Ndøhay ma sørmara cek na,  
ya da tørdä mesørey cek ata ha nga cek nga tede.  
Ndøhay masa ta lenɗesl na,  
ya da tørdä lenɗesl ata ha nga cek nga tede.»

---

1:14 1.14 Kørispus: SNM 18.8; Gayus: Rm 16.23-24 1:16  
1.16 Estefanas: 16.15 1:18 1.18 Rm 1.16; 2Kwr 4.3 1:19 1.19 Iz 29.14;  
Jøw 12.13, 17; Iz 19.12-14; 44.25 1:19 1.19-20 3.18-20; Mt 11.25;  
Rm 1.22

<sup>20</sup> Da kōne na, ndōhay ma sōrmara cek na, mesōrey cek ata ha, a da vōltar me? Yaw, \*ndōhay maa sōrkada kwakwas ŋga Mawiz na, meesōrkedey ata ha a jōnta fa mey ŋga Gazlavay la daw? Ndōhay ma ka yawa wure keḏe kaa na, mekey yawa ata ha a vōltar me? Gazlavay ta wuzda cay, mesōrey cek da bōla kaa na, ara cek ŋga tede, a lōhey ndaw ba.

<sup>21</sup> Ndōhay da bōla keḏe a sōram cek hay mekele mekele. Ta hōtmar cek masa Gazlavay ma ka ta lenḡesl aṅga la, ama kwa ta sōrmara Gazlavay daa ba. Maja ŋgene, a mbafar a Gazlavay amba ndōhay ma tōba mey aṅga a lōham na, ta fa mey masa ala ma wuzdamara da ray memōcey ŋga Yesu fa hwadam mazlanḡalakaya. Mey masa ala ma wuzdamara ha na, ndōhay da bōla a paḏamara ŋga cek ŋga tede.

<sup>22</sup> Anda keḏe, \*Jōwif hay a wuḏam ŋga hōtey maazla amba a sōrmara mey masa ala ma wuzdamara na, ara mey fara fara. Gōrek hay na, a wuḏam ŋga sōrey cek ta lenḡesl ata gway. <sup>23</sup> Ama ala na, ya wuzam mey da ray Kōriste ma mōcey fa hwadam mazlanḡalakaya. Jōwif hay ma cōndamara mey a na, a cam mevel, a wulkam a key ya cōḏmara Gazlavay. Ndōhay masa Jōwif hay ba ma cōndamara mey a na, a lōvam ara mey ŋga tede.

<sup>24</sup> Ama ndōhay masa Gazlavay ma zōlta, kwa Jōwif hay, kwa Jōwif hay ba, ŋgada ata na, Kōriste a wuzwa gōḏaṅ ŋga Gazlavay, asaya, a wuzwa lenḡesl maaya ŋga Gazlavay.

<sup>25</sup> Cek ŋga Gazlavay masa ndōhay ma wulkam ara cek ŋga tede na, cek aha, aṅga ta lenḡesl maaya a fōna lenḡesl ŋga ndaw-magōḏaṅ. Slōra ŋga Gazlavay masa ndōhay ma wulkam a ka anda ndaw masa-bōle na, slōra ha, makakaya

ta gədaŋ ma fəna gədaŋ ŋga ndaw-magədaŋ.

<sup>26</sup> Məlma aɗaw hay, wulkam cey. Akwar masa Gazlavay ma zəlkwar na, akwar səkway ŋga ndəhay wura? Fa dey ŋga ndəhay da bəla na, ndəhay ta leŋgesl ga da wuzlah akwar daa ba. Asaya, ndəhay ta gədaŋ, leŋ ndəhay mahura hay da wuzlah akwar ga daa ba. <sup>27</sup> Sasəkar jak, Gazlavay a weley na, ndəhay masa ndəhay da bəla \* ma wulkam ara cek hay ŋga tede amba a patar hwaray a ndəhay masa ta leŋgesl. Gazlavay a weley na, ndəhay masa ndəhay ma wulkam ata masa-bəle hay amba a patar hwaray a ndəhay masa ta gədaŋ. <sup>28</sup> Gazlavay a weley na, ndəhay saw ŋga tede masa ndəhay ma rəsmata amba aa zəɗɗata ndəhay mahura hay. <sup>29</sup> Maja ŋgene, kwa ndaw pal fa da zlepey fa mey ŋga Gazlavay daa ba. <sup>30</sup> Yaw, ara maja sləra masa Gazlavay ma ka, akwar macəmkaya ta Yesu Kəriste. Gazlavay a wəɗndakwar leŋgesl na, ta fa Kəriste he. Ara ta fa Yesu Kəriste he saya, Gazlavay ma pandakwar ŋga ndəhay maaya fa mey aŋga, a walandakwar wal ŋgada aŋga, asaya, a ləhdandakwar daa meməcey. <sup>31</sup> Anda keɗe, a key anda mawuzlalakaya daa ɗerewel ŋga Gazlavay, ma ləvey: «Da ndaw a wuɗey ŋga zlepey na, ŋga zlepey da ray sləra masa Bay Gazlavay ma ka gway.»

## 2

*Pawl a wuzey mey da ray meməcey* ŋga Yesu

<sup>1</sup> Məlma aɗaw hay, masa yah ma daw fa akwar ŋga wuzdakwara mey maɓadakaya ŋga Gazlavay heyey na,

---

1:25 1.25 2Kwr 13.4    1:26 1.26 Jarŋ 7.48    \* 1:27 1.27 ndəhay da bəla: Ara ndəhay ma namar ray a Gazlavay ba. Nəka 1Kwr 5.10.

1:27 1.27-28 Rm 12.16; Jak 2.5; Lk 1.51-53; 6.20    1:30 1.30 2Kwr 5.21    1:31 1.31 1.29; 2.2; 4.7; Jer 9.22-23; 2Kwr 10.17; 11.30; 12.5; Ef 2.9

ya taa guzley ta mey masa mazlɔɔkaya daa ba, asaya, ya taa guzley ta mey masa ma hɔɔkwara ray daa ba.

<sup>2</sup> Daa masa yah da wuzlah akwar na, ya ta kɔrza mevel la nga wulkey si da ray Yesu \*Kɔriste ma mɔcey fa hwadam mazlanɔalɔkaya gway. <sup>3</sup> Daa ngene, yah masa-bɔle, mandɔrzay fa kaya, ya faa wesey. <sup>4</sup> Masa ya fa wuzdakwara mey nga Gazlavay na, ya taa guzley ta mewulkey nga ndaw-magɔɔɔn amba ka tɔɔmara mey aɔaw na, daa ba. Ama ara gɔɔɔn nga \*Mesɔfney nga Gazlavay ma wuzdakwara mey aɔaw a na, ara mey fara fara. <sup>5</sup> Da ray ngene, ka pamara Yesu nga ndaw akwar fara fara na, ara maja lenɔesl nga ndɔhay ba, ama ara maja gɔɔɔn nga Gazlavay.

#### *Mey da ray lenɔesl maaya nga Gazlavay*

<sup>6</sup> Ta ngene he cɔpa, ala faa sɔrkadamata ndɔhay ma tɔɔmara mey nga Gazlavay maaya maaya ta lenɔesl masa fara fara da ray a. Yaa sɔrkadamata na, nga sɔrey cek ta lenɔesl nga ndaw-magɔɔɔn ba, asaya, ta lenɔesl nga bay hay da bɔla keɔe ba, bay hay masa Gazlavay ma daa zɔɔdata. <sup>7</sup> Ama mesɔrey cek masa ala maa guzlam da ray a keɔe na, ara ta lenɔesl nga Gazlavay. Ara cek mabadakaya dɔga zleezle fa dey nga ndɔhay. Dɔga bɔla ta zley daa ba arɔn na, Gazlavay ta wudɔey la nga lɔhdandakwar ta fa lenɔesl e amba ya mbɔzkwa aa slam anɔa mewudɔey. <sup>8</sup> Bay hay ma wam da bɔla keɔe ta sɔrmara lenɔesl e daa ba. Da ta sɔrmara la na, anɔa ta dɔrmara Bay alɔkwa Mahura, ndaw masa ta gɔɔɔn, fa hwadam mazlanɔalɔkaya daa ba. <sup>9</sup> Cek masa Gazlavay

---

2:1 2.1 1.17    2:2 2.2 1.23; Gal 6.14    2:3 2.3 SNM 18.9; 2Kwr 10.1, 10  
 2:4 2.4 4.20; 1Tes 1.5    2:5 2.5 1.18, 24    2:7 2.7 Rm 5.2; 2Kwr 3.18; 4.17;  
 Kwa 1.26    2:8 2.8 Lk 23.34

ma ka ha na, aṅga anda mawuzlalakaya daa ɗerewel ṅga Gazlavay ma ləvey:

«Cek masa Gazlavay ma ɗiya

ṅgada ndəhay masa aa ma wuɗta na,

ara cek ma fəna mewulkey ṅga ndaw-magədaṅ.

Kwa ndaw pal ta hətər cek aha ta dey aṅga daa ba,

kwa ndaw pal ta cənda ta sləmay aṅga daa ba may.»

<sup>10</sup> Ara ṅgada aləkwa Gazlavay ma wuzdandakwara cek aha ṅgene ta fa Mesəfney aṅga. Mesəfney a, a sərta cek hay tabiya, kwa mewulkey ṅga Gazlavay maɓadakaya na, a səra.

<sup>11</sup> Ndaw na, a səra mewulkey ṅga ndaw mekele daw? Si ndaw aha ray aṅga ma səra mewulkey aṅga, ba diya? Aṅga letək ta Gazlavay may, ma səra mewulkey ṅga Gazlavay na, wa? Si Mesəfney aṅga. <sup>12</sup> Mesəfney masa da ray aləkwa na, a sawa ta fa ndəhay magədaṅ ba, ama ara Mesəfney masa Gazlavay ma vəldandakwara amba ya sərmatakwa cek hay maaya tabiya masa Gazlavay ma vəldandakwara.

<sup>13</sup> Daa masa ala faa guzlmatar a ndəhay na, yaa guzlmatar ta mey masa ndəhay maa sərkaɗamandar ta leṅgesl ata ba, ama ara \*Mesəfney ṅga Gazlavay maa sərkaɗandar ṅгаа guzley. Anda keɗe, ala fa wuzdamara mey masa fara fara da ray Gazlavay. Ya wuzdamara na, ṅgada ndəhay masa ta Mesəfney ṅga Gazlavay da ray ata.

<sup>14</sup> Ndaw masa ta Mesəfney ṅga Gazlavay da ray a daa ba na, a gwa ṅga təɓa mey ṅga Mesəfney ṅga Gazlavay ba. A cənda mey a ba, a wulkey ara mey ṅga tede, maja ma gwa ṅga nəkə mey a ta ma gwa ṅga cənda na, si ndaw ta Mesəfney ṅga Gazlavay da ray a gway. <sup>15</sup> Ndaw



ta Mesəfney nga Gazlavay na, a gwa nga nəkta cek hay tabiya, a sərta cek hay maaya ta maaya ba. Ama ndaw aha na, ndaw ma gwa nga sangala daa ba. <sup>16</sup> Anğa letek anda mey nga Gazlavay mawuzlalakaya ma ləvey:

«Ma səra mewulkey nga Bay Gazlavay na, wa?

Ma da slar yawa a Bay Gazlavay na, wa?»

Ama aləkwa\* na, mewulkey aləkwa letek ta nga Kəriste.

### 3

*Mey da ray ndəhay* ma ka sləra nga Gazlavay

<sup>1</sup> Məlma adaw hay, ngaa guzley ngada akwar anda yah maa guzley ngada ndəhay masa ta \*Mesəfney nga Gazlavay da ray na, ya gwa ba. Ama yaa guzlkwar na, anda ngada ndəhay da bəla ma kam cek anda ata ma wudfam gway, maja akwar anda bəza hay mecəhe daa cəvedf nga \*Kəriste. <sup>2</sup> Yaa sərkadakwar na, cek masa ta gəra ba aranj. Anğa letek anda bəzey ma sey dəwa ma zəmey daf ba aranj. Akwar may, kwa wure kecf, mey masa ta gəra na, ka cəndamara ba aranj anda bəzey ma gwa nga zəmey daf ba aranj, <sup>3</sup> maja leŋgesl akwar na, anda nga ndəhay da bəla daada gway. Akwar fa kam səleŋ da wuzlah akwar, akwar fa təram vaw da wuzlah akwar. Da ray ngene, mewulkey akwar na, anda nga ndəhay da bəla daada gway. Menjey akwar na, anda nga ndəhay da bəla gway may. <sup>4</sup> Da ndaw da wuzlah akwar a ləvey: «Ya səpey na, Pawl,» ndaw mekele a ləvey: «Ya səpey na, Apalaws,» mey hay a kecf na, ara mewulkey nga ndaw da bəla, ba daw?

---

\* <sup>2:16</sup> <sup>2.16</sup> aləkwa: Pawl ta ndəhay mekele ta Mesəfney nga Gazlavay da ray ata. <sup>2:16</sup> <sup>2.16</sup> lz 40.13; Rm 11.34 <sup>3:1</sup> <sup>3.1</sup> Jan 16.12 <sup>3:2</sup> <sup>3.2</sup> Heb 5.12-13; 1Pi 2.2 <sup>3:3</sup> <sup>3.3</sup> 1.10-11; Gal 5.19-20 <sup>3:4</sup> <sup>3.4</sup> 3.4-5 1.12

<sup>5</sup> Apalaws na, wa? Yah Pawl na, wa? Ala na, ndəhay ma ka sləra ŋga Gazlavay gway. A slərdandərwa amba ka təbmarə mey da ray Kəriste. Kwa waawa da wuzlah ala, a key sləra masa Gazlavay ma vəldara. <sup>6</sup> Ala na, anda ndəhay mehəvey\*. Yah na, ndaw ma sləka cek, Apalaws na, ndaw ma mbədar yam. Ama Gazlavay na, ndaw ma gəlda cek aha. <sup>7</sup> Maja ŋgene, ndaw ma sləka cek ta ndaw ma mbədar yam na, ara ndəhay ŋga tede. Ara Gazlavay pal ma gwa ŋga gəlda cek aha, ara aŋga ma wey da ray a. <sup>8</sup> Ndaw ma sləka cek ta ndaw ma mbədar yam na, ata letək, Gazlavay a da pəlar kwa ŋgada waawa təde fa sləra aŋga. <sup>9</sup> Ala cew e na, ala fa kam sləra ŋgada Gazlavay. Akwar na, anda ley ŋga Gazlavay.

Asaya, akwar na, anda way ŋga Gazlavay maləmkaya. <sup>10</sup> Gazlavay ta vəlya gədaŋ la ŋga zley sləra ha. Yah na, anda ndaw meləmey way, ma pa salay ŋga way maaya maaya ta aŋgwa. Wure kede, ndaw mekele ta sawa la ŋga ləma way a. Ama si kwa waawa a pey lenjesl maaya maaya daa meləmey way a. <sup>11</sup> Salay ŋga way mapakaya cay, ara Yesu Kəriste. Ndaw ma gwa ŋga pey salay ŋga way mekele daa saba. <sup>12</sup> Da ray salay ŋga way a na, ndəhay siya a ləmamara way a ta bərey maaya, siya hay ta aŋgwa maaya, ndəhay mekele may a kədmara ta hwadam, siya hay a kərcamara ta guzer, da daa ba, ta panay. <sup>13</sup> Ta pas masa Gazlavay ma da ka sariya na, sləra ŋga kwa waawa

---

\* <sup>3:6</sup> <sup>3.6</sup> ndəhay mehəvey: Pawl a wudfey ŋga ləvey ara aŋga ma zlar ŋga wuzey mey ŋga Gazlavay da Kwarinti. Fa dəba ha, Apalaws a daw, a vəltar gədaŋ ta mey a saya. Ama ara Gazlavay ma gwa ŋga jənta ndəhay da Kwarinti amba a diyam fa mey fa mey daa cəved ŋga Gazlavay. <sup>3:6</sup> <sup>3.6</sup> SNM 18.4, 11, 24-28 <sup>3:8</sup> <sup>3.8</sup> 4.5 <sup>3:9</sup> <sup>3.9</sup> Mt 13.3-9; Ef 2.20-21; 1Pi 2.4-6 <sup>3:10</sup> <sup>3.10</sup> 1Kwr 15.10 <sup>3:11</sup> <sup>3.11</sup> Iz 28.16; SNM 4.11-12

a wuzwa la fa dey nga ndøhay, maja ta pas a ñgene na, awaw magøðkaya a wuzdørwa sløra maaya ta maaya ba nga ndaw a nga ndaw a la. <sup>14</sup> Da way masa ndaw ma løma taa wurey daa ba na, ñgene, a høtey mawurbay nga sløra a nga la. <sup>15</sup> Da way masa ndaw ma løma taa wurey sem na, ñgene, a høtey mawurbay nga sløra a nga daa ba. Ndaw aha na, a løhey la, ama meløhey a na, ta banay, anda ndaw meløhey daa awaw.

<sup>16</sup> Ka sørmara fara fara, akwar na, anda way masa Gazlavay ma njeý da hwað a, asaya, Mesøfney nga Gazlavay aa da mevel akwar. <sup>17</sup> Ndaw ma bøzla way masa Gazlavay ma njeý da hwað a na, Gazlavay aa zøðda ndaw aha la may, maja way a, ara way ñgada Gazlavay taava a nga. Way masa Gazlavay ma njeý da hwað a ha na, ara akwar, ray akwar.

<sup>18</sup> Wam vaw, ka da batam ray akwar ba. Da ndaw da wuzlah akwar, a wulkey a sørey cek kalah da bøla keðe na, nga key anda a søra cek ba, amba a tørey ndaw ma søra cek masa fara fara. <sup>19</sup> Yaa guzley anda keðe na, maja mesørey cek da bøla keðe na, ara cek nga tede fa mey nga Gazlavay. Maja ñgene, mey nga Gazlavay aa guzley a løvey: «Gazlavay a kørzata ndøhay ma søra cek hay la anda ndaw ma kørzey cek ta gadañ. A kørzata na, maja wewer ata maaya ba masa ata ma kamara ñgene.» <sup>20</sup> Mey nga Gazlavay faa guzley saya, a løvey: «Bay Gazlavay na, a søra mewulkey nga ndøhay ma søra cek hay. A søra mewulkey ata ha na, ara cek nga tede.» <sup>21</sup> Anda keðe, ndaw a da zlepey maja ndaw ba, maja cek hay tabiya na, ñgada akwar. <sup>22</sup> Anda meløvey, yah Pawl, Apalaws leñ \*Piyer na, ala tabiya ñgada akwar. Bøla keðe, menjeý ta

---

3:13 3.13-15 Rm 2.6; 2Kwr 5.10      3:15 3.15 Jud 23      3:16 3.16 6.19; Rm 8.9, 11, 15; 2Kwr 6.16; Gal 5.25; 1Pi 2.5      3:18 3.18 4.10      3:19 3.19 JøW 5.12-13; 1Kwr 1.20      3:20 3.20 Ps 94.11

dey, leŋ meməcey na, ara ŋgada akwar. Asaya, cek hay ma kam wure keɗe ta cek hay ma da kam ŋgada fa mey na, ara ŋgada akwar. <sup>23</sup> Ama akwar na, ŋgada Kəriste, Kəriste may, ŋgada Gazlavay.

## 4

*Mey da ray ndəhay* meslərey ŋga Yesu Kəriste

<sup>1</sup> Sərmara, ala na, ndəhay ma ka sləra ŋga \*Kəriste. Mey ŋga Gazlavay masa maɓadakaya na, Gazlavay ta mbəkɗandara la a har ala amba ya wuzdamatara a ndəhay. <sup>2</sup> Da a mbəkam cek a har ndaw amba a nəkɗey dey fa wəɗa na, si ndaw aha a nəkfar dey fara fara anda ndaw ma mbəkɗara ha ma ləvar. <sup>3</sup> Da akwar, da daa ba, ndəhay ma ka sariya da bəla keɗe, fa nəkmarə sləra aɗaw anda maaya ba, ŋgada yah na, a təɗɗya mevel ba. Kwa yah may, ya gwa ŋga nəka sləra aɗaw ba. <sup>4</sup> Cek masa yah ma ka maaya ba na, ya səra ba, ama ŋga ləvey yah ndaw maaya na, ya gwa ŋga ləvey kəne ba may, maja ma da ɗəsla mey da ray aɗaw na, ara Bay Mahura pal taava aŋga.

<sup>5</sup> Maja ŋgene, ka daa guzlam maaya ba da ray sləra ŋga ndəhay ba. Səkwmarə ɗar masa Bay Mahura Yesu ma da ka sariya. Ta pas masa aa ma da wəhwa na, a wuzdatərwa cek hay maɓadatakaya masa daa ləvar la a palah. Cek hay masa ndəhay ma wulkam daa mevel ata na, a wuzdatərwa la may. Anda keɗe, Gazlavay a da həlma kwa waawa təɗe fa sləra masa aa ma ka.

<sup>6</sup> Məlma aɗaw hay, ya ta wuzkwar cek la da ray ala ta Apalaws amba a jənkwar ŋgaa sərkey cek hay maaya maaya. Ya wuɗey ka kam anda ala, anda mey a daha, ma ləvey: «Mey majəwkaya masa mawuzlalakaya cay

na, ndaw a da zlēngēy ta ray a ba.» Anda keḏe, ka da hōslmar ray a ndaw langar, ka rōsmara ndaw langar na, kōne ba. <sup>7</sup> Ma pa kwa waawa da wuzlah akwar ŋga ndaw mahura da ray ndōhay siya na, wa? Ma vōldakwara cek hay tabiya na, ara Bay Gazlavay, ba diya? Da ara Gazlavay ma vōldakwara na, kaa ka zlapam anda ara Gazlavay ma vōldakwara ba, kwara?

<sup>8</sup> Ka wulkam akwar ta hōtam cek hay tabiya cay! Akwar na, ndōhay masa-zleley hay dōba! Akwar na, bay hay, ama ala na, bay hay ba. Mewulkey akwar a ŋgene na, fara daw? Da akwar bay hay fara na, ara cek maaya amba ya zōmkwa bay a bama daa slam a. <sup>9</sup> Ala ndōhay meslōrey ŋga Yesu Kōriste na, ya wulkey Gazlavay ta pandar sem ŋga ndōhay mecōhe hay. Ala na, anda ndōhay masa sariya ta kōrzata sem, ma da kadamata wasa ŋga kōḏey vagay fa mey ŋga ndōhay tabiya. A kamara kōne fa mey ŋga ndōhay da bōla ta fa mey ŋga maslaŋ hay ŋga Gazlavay.

<sup>10</sup> Ndōhay a pamandar ŋga ndōhay ma ka cek hay saw maja ala fa wuzam mey da ray Kōriste. Ama akwar na, ndōhay ta leŋgesl maja akwar macōmkaya ta Kōriste. Ala anda ndōhay masa-bōle hay, ama akwar na, masa-gōdaŋ hay. Ala na, ndōhay a hōtmandar fa dey ba, ama akwar na, ndōhay fa hōslmakwar ray. <sup>11</sup> Haa wure keḏe, may fa candar, yam fa kandar, zana fa vaw ala gwanjadā-ḏay-ḏay, ndōhay fa sōrdamandar banay, ala fa pōkam saw, way ala hay daa ba, <sup>12</sup> ya kam slōra ta gōdaŋ ala ŋga hōtey cek ŋga zōmey. Da ndōhay a cōḏmandar na, yaa cōḏamara Gazlavay ŋga katar maaya. Da ndōhay a sōrdamandar banay na, ya bōsmara gway. <sup>13</sup> Da ndōhay

---

4:7 4.7 Gal 6.3    4:9 4.9 Rm 8.36; Heb 10.33    4:10 4.10 3.18    4:10  
4.10-13 2Kwr 11.23-29    4:12 4.12 Lk 6.28; SNM 7.60; Rm 12.14; slōra ŋga  
Pawl: SNM 18.3

aa guzlam maaya ba da ray ala na, yaa guzlmatar ta mey maakwad a. Haa wure keɗe, fa dey nga ndohay na, ala anda cek hay makwiydakaya da ray-tokal, ala anda cek hay nga tede.

<sup>14</sup> Ya wuzlalakwara mey keɗe na, nga pakwar hwaray ba, ama amba ya koɗkwara anda akwar boz adaw hay masa yah ma wudta kalah. <sup>15</sup> Kwa ndohay ga a slɔfam ba faa sarkadamakwar da ray Kɔriste, ama papakw akwar na, ara yah pal gway. Yah anda papakw akwar na, maja akwar macomkaya ta Yesu Kɔriste daa masa yah ma wuzdakwara \*Mey-maaya-mawiya. <sup>16</sup> Anda keɗe, ya kakwar ambahw, kam cek anda yah ma ka. <sup>17</sup> Ara maja ngene, ya fa slɔrdakwara Timawte, boz adaw masa yah ma wudta kalah, anga ndaw ma key slɔra ta cɔved e daa mecɔmey-ray nga Bay Mahura. Ya slɔrdakwara na, amba aa sarkadakwara cek masa yah ma ka daa menjey adaw daa cɔved nga Kɔriste saya. A daa sarkadakwara na, anda yah maa sarkadata ndohay daa \*mecɔmey-ray nga ndohay nga Yesu mandaw mandaw kwa daa wura daa wura cɔpa.

<sup>18</sup> Ndohay siya da wuzlah akwar fa zlapam maja a wulkam na, ya fa da vohay fa akwar daa saba. <sup>19</sup> Ama da Gazlavay ta tɔba la na, gweegwe ya vohay fa akwar saya. Da masa yah ma wusey la na, ya hɔtfatar ndohay ma zlapam hay a la. Anda keɗe, ya da sangalawa na, mey masa ata maa guzldamara daada ba, ama ya da sangalawa slɔra masa ata ma kamara may. <sup>20</sup> Ya fa sarkwa, mewey nga Bay Gazlavay da ray ndohay na, a wuzwa ta fa gɔdaɗ nga \*Mesofney nga Gazlavay, ba na, a wuzwa ta fa mey

---

4:13 4.13 Mwy 3.45 4:15 4.15 Gal 4.19 4:16 4.16 11.1; Fɔl 3.17; 1Tes 1.6 4:17 4.17 Timawte: 16.10; SNM 16.1; 2Kwr 1.1 4:19 4.19 da Gazlavay ta tɔba la: SNM 18.21; Jak 4.15

meeguzley gway ba. <sup>21</sup> Akwar, ka wuɗam na, kwara? Ka wuɗam ya sawa fa akwar ta laway da har daw? Da daa ba, ya sawa ta mevel maaya amba ya wuzdakwara ya fa wuɗkwar daw?

## 5

### *Mey da ray ndaw ma key cek malamba*

<sup>1</sup> Ya fa cɓnda fa ndɓhay daa wura daa wura, a lɓvam ndaw da wuzlah akwar daha fa ley vaw saw. Kwa ndɓhay ma sɓrmara Gazlavay ba na, fa kam cek anda aɗga ma ka ɗgene daa ba. A lɓvmaya ndaw a fa ney ta ɗgwas ɗga papaha. <sup>2</sup> Sasɓkar ka tɓwam ba jak daw? Ka zlapam na, kwara? Ndaw ma key cek anda ɗgene na, si ka bɓlmara la da wuzlah akwar\*. <sup>3</sup> Yah na, yah da wuzlah akwar fetede ba, ama mevel aɗaw aa ta akwar. Ya ta ɗɓsla mey da ray ndaw ma key cek malamba anda ɗgene cay anda yah da wuzlah akwar. <sup>4</sup> Ya ɗɓsla mey a na, ta mezɓley ɗga Bay alɓkwa Mahura Yesu. Anda keɗe, ta pas masa akwar macɓmkaya daa slam a na, mevel aɗaw a da njeɗ ta akwar, asaya, gɓdaɗ ɗga Bay alɓkwa Mahura a da njeɗ ta akwar may. <sup>5</sup> Daa mecɓmey akwar a ɗgene, vɓldamara ndaw aha a bay-malula ɗga sɓrda banay ta vaw aɗga, amba Gazlavay a lɓhda mesɓfney aɗga ta pas masa Bay alɓkwa Mahura ma da vɓhwa.

<sup>6</sup> Ka zlapam na, maja me? Mezlepey na, ara cek maaya ba. Ka sɓrmara cek ma hɓsla hapa ɗga makala kuset kɓɗey na, a gwa ɗga hɓsla hapa ɗga makala maɗakaya ga, ba diya? Aɗga letek kɓne, mebɓrey ɗga ndaw pal na, a gwa ɗga nɓsa mecɓmey-ray akwar tabiya. <sup>7</sup> Anda

---

4:20 4.20 2.4; 15.24    4:21 4.21 2Kwr 1.23; 13.10    5:1 5.1 Lev 18.8    \* 5:2  
5.2 da wuzlah akwar: A wuɗɗey ɗga lɓvey, daa mecɓmey-ray ɗga  
ndɓhay ɗga Yesu.    5:2 5.2 6.12; 10.23    5:3 5.3-4 Kwa 2.5    5:5  
5.5 1Tm 1.20    5:6 5.6 Gal 5.9

ala \*Jøwif hay maa zakadamara cek ma høsla peŋ da way ala hay masa gwagway ŋga \*Pak gweegwe cay na, akwar may, bølmarā ndaw aha la maja aŋga na, anda cek ma høsla peŋ maaya ba da wuzlah akwar. Anda keɗe, ka da tēram anda hapa ŋga makala maɗakaya tēlam manjar cek ma høsla da hwaɗ a. Ya sēra fara fara Gazlavay ta tērdakwar sem manjar mebērey ta fa memōcey ŋga \*Kēriste. Anda Jøwif hay ma hērmara bēz-tēbāŋ ŋgada Gazlavay ta gwagway ŋga Pak na, Kēriste na, aŋga anda bēz-tēbāŋ alēkwa ma mōcey maja alēkwa. <sup>8</sup> Anda keɗe, kakwa gwagway! Ama ya kakwa gwagway a na, ta peŋ manjar cek ma høsla da hwaɗ a. Anda melōvey, mbēkdakwa mekey maagway. Tērkwa ndēhay manjar mebērey, ndēhay maaya masa ma ka cek ta cēveɗ e.

<sup>9</sup> Daa leeter aɗaw laŋgar daha na, ya ta wuzlalakwar la, ya lōvkwar ka da cēmam ɗay ta ndēhay ma lam vaw saw ba. <sup>10</sup> Yaa guzley na, da ray ndēhay ŋga bēla keɗe ba. Da bēla keɗe na, ndēhay ma lam vaw saw, ndēhay ma kam dey fa cek hay ŋga ndēhay, mayal hay leŋ ndēhay ma tam kuley hay daha. Da ndaw a lōvey a njeŋ ta ndēhay a daa slam a ba na, ŋgene si a mbēkda bēla keɗe kwa. <sup>11</sup> Ama yaa guzley na, da ray ndēhay ma sēpam cēveɗ ŋga Yesu Kēriste. Da ndaw a lōvey aŋga fa sēpa cēveɗ ŋga Yesu, fa dēba ha, a ley vaw saw, da daa ba, a key dey fa cek ŋga ndaw, da daa ba, a tey kuley hay, da daa ba, a cēɗey ndaw, da daa ba, a sey wuzam, a wey, da daa ba, a leley na, ŋgene, ka da njam ta ndaw aha daa slam a ba. Kwa ɗaf na, ka da zēmam daa slam a ba may. <sup>12-13</sup> Ndēhay ma sēpam cēveɗ ŋga Yesu ba na, ara yah ma da katar sariya ba. Ara Gazlavay ma da katar sariya. Ama akwar na, si

5:7 5.7 Mab 12.1-15; 13.7; Janj 1.29; 1Pi 1.19

5:9 5.9 Mt 18.17; 2Tes 3.14

5:11 5.11 6.9-10; 2Tes 3.6; Tit 3.10; 2Jh 10



ka sanɗalamata ndəhay da wuzlah akwar, ba diya? Mey ŋga Gazlavay mawuzlalakaya, a ləvey: «Ndaw ma key cek malamba na, ɓəlmara la da wuzlah akwar.»

## 6

### *Mey da ray sariya*

<sup>1</sup> Da ndaw da wuzlah akwar ta təram vaw la ta ndaw mekele da wuzlah akwar na, ndaw aha a wuda fa ndəhay ma ka sariya masa ma sərmara Gazlavay ba na, kwara? A da wuda fa ndəhay a ŋgene ba səlak. Anja maaya na, a wuda fa ndəhay ŋga Gazlavay.

<sup>2</sup> Ka sərmara, ma da ka sariya ŋgada ndəhay da bəla tabiya na, ara ndəhay ŋga Gazlavay, ba diya? Da ara akwar ndəhay ŋga Gazlavay ma da kamatar sariya a ndəhay da bəla na, kaa cek mecəhe anda ŋgene, ka gwamara ŋga ɗəslmara mey da ray a ba na, kwara? <sup>3</sup> Sərmara, kwa maslan hay ŋga Gazlavay da vaɗ \* na, ara aləkwa ma da kamatakwar sariya. Yaw, da ara anda keɗe na, kaa ya gwakwa ŋga ɗəsley mey hay da bəla keɗe ba na, maja me?

<sup>4</sup> Ndəhay masa ma sərmara Gazlavay ba na, mey ata ta akwar, ndəhay ma təɓa mey ŋga Yesu, daa ba. Da kəne na, ka handamara mey ma key da wuzlah akwar ŋgada fa ata amba a ɗəslmakwara na, kwara? <sup>5</sup> Yaa guzlkwar anda keɗe na, amba hwaray a kakwar. Fara fara, ndaw pal masa ta ləngesl da wuzlah akwar ŋga ɗiykwara mey hay na, daa ba daw? <sup>6</sup> Nəkmara cek masa akwar ma kamara! Akwar fa wudam vaw da wuzlah akwar, asaya, ka wudam vaw a na,

---

5:12-13 5.12-13 Mew 13.6 6:2 6.2-3 Rm 5.17; 2Pi 2.4; Jud 6; CWJ 1.6 \* 6:3 6.3 maslan hay ŋga Gazlavay da vaɗ: Ara maslan hay siya masa ma rəsmara Gazlavay zleezle. Nəka Jud 6; 2Pi 2.4.

fa mey nga ndøhay ma sørmara Gazlavay ba. ŋgene na, ara cek maaya daw?

<sup>7</sup> Fara fara, akwar fa wudam vaw da wuzlah akwar. Mewudey vaw akwar a ŋgene a wuɗey nga løvey akwar fa kam cek maaya anda Gazlavay ma wuɗey na, daa ba səlak. Da ndaw a kakwar cek maaya ba, da daa ba, a lalakwar na, maaya na, ka ðøsmara gway, ka da wudmara ba. <sup>8</sup> Ma kam cek maaya ba ŋgada ndøhay na, ara akwar ta ray akwar jak. Kwa mølmakw akwar hay siya daa cøvedŋ nga Yesu na, akwar fa lalamatara cek ata hay. <sup>9</sup> Ka sørmara fara fara, ndøhay ma kam cek maaya ba na, fa da mbøzam aa slam masa Gazlavay fa wey da vaɗ na, daa ba. Pam leŋgesl, ka da føcam ray akwar ba. Sørmara, ndøhay ma kam cek malamba, ndøhay ma ta kuley hay, ndøhay ma lam vaw saw da palah, zel hay ma lam vaw ta zel cøla ta ŋgusay ma lam vaw ta ŋgwas cøla, <sup>10</sup> ndøhay ma lalam cek hay nga ndøhay mekele, ndøhay ma kam dey fa cek nga ndøhay, ndøhay ma sam wuzam ma wam, ndøhay ma kam mbaɗa fa ndøhay leŋ ndøhay ma bøzla ndøhay, fa da mbøzam aa slam masa Gazlavay fa wey da vaɗ na, daa ba. <sup>11</sup> Zleezle na, ndøhay da wuzlah akwar fa kam cek maaya ba køne. Ama wure keɗe na, Bay aløkwa Mahura Yesu \*Køriste ta \*Mesøfney nga Gazlavay aløkwa ta pørmakwar sem, akwar manjar mebørey, ta walamakwar sem wal ŋgada Gazlavay, ta tørdamakwar sem nga ndøhay maaya fa mey nga Gazlavay.

*Mey da ray menjey maaya ma mbafar a Gazlavay*

<sup>12</sup> Ndøhay siya da wuzlah akwar fa wulkam, a løvam: «Cek matøkakaya nga key na, daa ba.» Ahaw fara, cek matøkakaya daa ba, ama cek hay siya fa da jønkwar daa

6:7 6.7 Mt 5.39-40; Rm 12.17  
Tit 3.3-7; Heb 9.14; 1Jn 1.7

6:9 6.9-10 15.50; Gal 5.19-21

6:11 6.11

ba. Ya wulkey yah ta cəvedŋ nga key cek wura wura tabiya, ama ya fa da vɔlda ray adaw nga tɔrey beke nga cek hay a na, daa ba. <sup>13</sup> Akwar fa wulkam saya, ka lɔvam: «Gazlavay a karawa cek mezɔmey maja hwaɗ, a karawa hwaɗ may maja cek mezɔmey.» Ahaw fara, ama Gazlavay a ka la amba a ndɔvdata cek hay a cewete. Gazlavay a lɔmrawa vaw nga ndaw na, nga key cek malamba ta anŋa ba. Ama a lɔmrawa na, amba ya sɔpkwa Bay alɔkwa Mahura Yesu \*Kɔriste. Asaya, ara Bay Mahura ma wey da ray vaw nga ndaw. <sup>14</sup> Gazlavay ta slɔkɗadɔrwa Bay alɔkwa Mahura Yesu sem daa memɔcey, alɔkwa may, a da slɔkɗandakurwa daa memɔcey ta gɔdanŋ anŋa.

<sup>15</sup> Ka sɔrmara vaw akwar hay na, ata anda mezɔvey hay nga vaw nga Kɔriste, ba daw? Ya gwa ya cɔmda mezɔvey hay nga vaw nga Kɔriste a dey nga ŋgwas-barlaw daw? Kɔne na, fa da key daa ba sɔlak. <sup>16</sup> Ndaw ma nam ta ŋgwas-barlaw na, vaw ata ta tɔrey sem anda ndaw pal na, ka sɔrmara ba daw? Ara anda mawuzlalakaya daa ɗerewel nga Gazlavay, ma lɔvey: «Ata cewete, a tɔram anda ndaw pal.» <sup>17</sup> Ndaw ma vɔlda ray anŋa a Bay Mahura Yesu na, mevel anŋa ta nga Bay Mahura ha na, ata letek.

<sup>18</sup> Maja ŋgene, ka da lam vaw saw ba. Mebɔrey hay mekele cɔpa masa ndɔhay ma kamara na, a nŋey fa vaw ata ba. Ama ndaw ma ley vaw saw na, a key ŋgene, a nɔsa vaw anŋa. <sup>19</sup> Vaw akwar ara slam-menjey nga \*Mesɔfney nga Gazlavay na, ka sɔrmara ba daw? Gazlavay a vɔldakwara Mesɔfney anŋa amba a nŋey daa akwar. Vaw akwar hay na, ara akwar ma wamara ba, ama ara Gazlavay ma wa. <sup>20</sup> Gazlavay ta mbɔɗkurwa sem

---

6:12 6.12 8.9; 10.23; Gal 5.13; 1Pi 2.16      6:13 6.13 Mt 15.17-19; 1Tes 4.3  
 6:14 6.14 15.15, 20; Rm 6.4; 8.11; 2Kwr 4.14      6:15 6.15 12.27      6:16 6.16  
 MC 2.24; Mt 19.5; Ef 5.31      6:17 6.17 Jan 17.21-23; Rm 8.9-11; 2Kwr 3.17-18;  
 Gal 2.20      6:19 6.19 3.16

ɲgada aɲga ta cek maaya ɲga ləhdakwar daa mebərey. Maja ɲgene, həslmar ray a Gazlavay ta cek masa akwar ma kamara ta vaw akwar.

## 7

*Mey da ray meley ɲgwas*

<sup>1</sup> Wure keɗe, amba ya mbəɗɗakwara aa mey masa akwar maa cəɗɗamaya daa leeter akwar heyey. Ka ləvmaya, maaya na, ndaw a ley ɲgwas ba. <sup>2</sup> Ama, maja ndəhay fa lam vaw saw ɲgene na, ɲgama kwa waawa ɲga ley ɲgwas, ɲgwas may, ɲga ley zel. <sup>3</sup> Maaya na, zel a vəldara vaw a ɲgwas aɲga, ɲgwas may, a vəldara vaw a zel e. <sup>4</sup> ɲgwas na, a gwa ɲga wa vaw aɲga ba, ama ara zel e ma wa. Ndaw-mezəle may, a gwa ɲga wa vaw aɲga ba, ama ara ɲgwas aɲga ma wa. <sup>5</sup> Anda keɗe, ka da təkam vaw da wuzlah akwar ba, si daa maɗɗay akwar ɲga ɗar nekəɗey amba ka dəram danɲay a Gazlavay kwa. Fa dəba ha, kamara anda maamandaw cəɲga. Da daa ba na, akwar fa da gwamara ɲga jəɗmara vaw akwar daa ba, \*Sataɲ a da batakwar.

<sup>6</sup> Yaa guzlkwar anda keɗe na, a key, ya təkakwar ɗay ba, ama a key, ya vəlkwar cəveɗ amba ka kamara kəne. <sup>7</sup> Da anda yah ma wuɗey na, ya wuɗey ndəhay tabiya a njam manjar ɲgwas anda yah. Ama Gazlavay a vəlda gəɗaɲ ɲgada ndəhay na, wal wal. ɲgada ndaw lanɲar a vəlar gəɗaɲ ɲga ley ɲgwas, ɲgada ndaw lanɲar, a vəlar gəɗaɲ ɲga njeɲ manjar ɲgwas.

<sup>8</sup> Wure keɗe na, ya wuɗey ɲgaa guzltar ɲgada ndəhay masa manjar ɲgusay ta ɲgada ɲgwas-vagay hay. Maaya na, ka njam kəne manjar ɲgwas anda yah, da daa ba, manjar zel. <sup>9</sup> Ama da ka gwamara ɲga bəsmara ba na, maaya na, zel a ley ɲgwas, da daa ba, ɲgwas a ley zel.

ŋgama zel a ley ŋgwas, da daa ba, ŋgwas a ley zel da ray mewuɗɗey ŋga ley vaw saw ŋgene ma da fɔnkwar ray.

<sup>10</sup> Yaw, wure keɗe ya wuɗɗey ŋgaa guzltar a ndɔhay masa ta ŋgusay, asaya, a ŋgusay masa ta zel hay masa ata daa \*mecɔmey-ray ŋga ndɔhay ŋga Yesu. Yaa guzley na, ara mey aɗaw ba, ama ara Yesu Bay Mahura maa guzley, a lɔvey: ŋgwas a da bey dasi zel e ba. <sup>11</sup> Da ŋgwas a mbɔkda zel e na, ŋga njeɗ kwa a ley zel mekele ba. Da a wuɗɗey ŋga ley zel saya na, ŋga vɔhey asi zel e magurma ŋga ɗiymɔrwa mey ata aa slam a. Zel may, a da ɓɔla ŋgwas aŋga ba.

<sup>12</sup> Wure keɗe, ya wuɗɗey ŋgaa guzley ŋgada ndɔhay mekele. Mey masa yah ma daa guzlda keɗe na, ara mey ŋga Bay Mahura saba, ama ara mey aɗaw gway. Ya fa lɔvkwara, da ndaw ma tɔɓa mey ŋga Yesu \*Kɔriste aa ta ŋgwas masa ma tɔɓa mey ŋga Yesu Kɔriste ba, asaya, da ŋgwas a ta tɔɓa la ŋga njeɗ ta aŋga na, a da ɓɔla ŋgwas aha ba. <sup>13</sup> Aŋga letɛk kɔne may, da ŋgwas ma tɔɓa mey ŋga Yesu aa ta zel masa ma tɔɓa mey ŋga Yesu ba, asaya, da zel e ta tɔɓa la ŋga njeɗ ta aŋga na, ŋgwas aha a da bey ba. <sup>14</sup> Yaa guzley anda keɗe na, maja ndaw masa ma tɔɓa mey ŋga Yesu daa ba araŋ kaa na, aŋga gweegwe ta Gazlavay maja aŋga macɔmkaya ta ŋgwas aŋga masa ma tɔɓa mey ŋga Yesu sem. ŋgada ŋgwas masa ma tɔɓa mey ŋga Yesu daa ba araŋ kwa kɔne may, aŋga gweegwe ta Gazlavay maja zel e. Da daa ba na, bɔz ata hay fa da njam maaya fa mey ŋga Gazlavay daa ba. Ama fara fara bɔz ata hay na, ata da wuzlah ndɔhay ŋga Gazlavay.

<sup>15</sup> Ama da ndaw ma tɔɓa mey ŋga Yesu ba fa wuɗɗey ŋga ɓɔla ŋgwas aŋga ma tɔɓa mey ŋga Yesu na, mbɔkdamara ŋga ɓɔla. Anda keɗe, ndaw ma tɔɓa mey ŋga Yesu, kwa

da ara zel, kwa da ara ngwas na, ata macɛmkaya daa saba. Mbɛkdamata nga wunkam ta zazay, maja Gazlavay a zɛlkurwa na, nga njeɣ daa zazay. <sup>16</sup> Kah, ngwas ma tɛba meɣ nga Yesu, ka sɛra fara fara, zel akah a lɛhey la daa meɛbɛrey maja kah daw? Kah, ndaw ma tɛba meɣ nga Yesu, ka sɛra fara fara, ngwas akah a lɛhey la daa meɛbɛrey maja kah daw?

*Mey da ray menjeɣ nga ndɛhay masa Gazlavay ma zɛlta*

<sup>17</sup> Cek mahura daa meɣ a keɛɛ na, ara meɣ masa yah maa sɛrkadatara a ndɛhay nga Yesu daa mecɛmeyeray hay tabiya. Maaya na, kwa waawa a ka slɛra masa Gazlavay ma vɛldara nga ka, asaya, nga njeɣ anda daa masa Gazlavay ma zɛla. <sup>18</sup> Da Gazlavay a zɛla ndaw ta sla mandawal daa ba ararɣ na, ngene, a da sla mandawal saba. Yaw, da Gazlavay a zɛla ndaw ta sla mandawal sem na, nga njeɣ ta mandawal arɣa maslakaya ha, kwa a key cek ba. <sup>19</sup> Kwa mandawal maslakaya, kwa manjar nga sley na, ara cek nga tede, maja a jɛney ndaw fa meɣ nga Gazlavay ba. Cek mahura na, ara meney ray a \*mewey nga Gazlavay. <sup>20</sup> Si kwa waawa a njeɣ anda daa masa Gazlavay ma zɛla. <sup>21</sup> Daa masa Gazlavay ma zɛlka na, kah beke daw? Da kɛne na, ka da wulkey ba. Ama da kah ta cɛvedɛ amba ka pɛska ray akah daa beke na, sɛpa cɛvedɛ e. <sup>22</sup> Beke masa Bay Mahura \*Kɛriste ma zɛla na, ta bawa sem daa beke maja arɣa macɛmkaya ta Bay Mahura ha. Yaw, ndaw-beke ba masa Kɛriste ma zɛla may, ta tɛrey sem beke nga Kɛriste he. <sup>23</sup> Gazlavay ta mbɛɛɛkurwa sem ngada arɣa ta cek maaya nga lɛhdakwar daa meɛbɛrey. Ka da tɛram beke

---

7:15 7.15 menjeɣ daa zazay: 14.33; Rm 12.18; 14.19; 2Kwr 13.11; Kwa 3.15; Heb 12.14 7:16 7.16 1Pi 3.1 7:18 7.18 Gal 5.1 7:19 7.19 Rm 2.25-29; Gal 5.6 7:22 7.22 Ef 6.6; Flm 16; 1Pi 2.16

nga ndøhay saba. <sup>24</sup> Mølma adfaw hay, kwa waawa nga njey anda daa masa Gazlavay ma zøla.

*Mey ngada ndøhay* manjar ngwas lej ngada ngwas-vagay hay

<sup>25</sup> Wure keðe, ya wuðey ngaa guzltar ngada ndøhay masa manjar ngusay, ta ngada ngusay masa manjar zel hay. Mey a na, ara Bay Mahura ma wuzdiwa ba, ama ara mewulkey adfaw gway. Ta ngene he cøpa, jøkfamaya slømay cønga maja yah na, Gazlavay ta sørfaya dey-ceceh la, amba yaa guzley mey masa fara fara ta gødanj nga Bay Mahura.

<sup>26</sup> Maaya na, ndøhay a njam anda ata manjatakaya gway. Yaa guzley anda keðe, maja wure keðe banay hay kalah. <sup>27</sup> Da ndaw anja ta ngwas na, a da bøla ngwas anja ha ba. Da ndaw ngwas anja daa ba na, a da ley ngwas ba. <sup>28</sup> Ama da ndaw a ley ngwas na, ara mebørey ba, da sabara a ley zel na, ara mebørey ba. Sørmara, ndøhay ma lam ngwas, da daa ba, ngusay ma lam zel na, a søram banay la ga da bøla keðe. Ya fa wuðey banay a, a sawa a ray akwar ba.

<sup>29</sup> Mølma adfaw hay, ya fa løvkwar, ðar nga key sløra nga Gazlavay ga daa saba. Anda keðe, døga wure keðe, ndøhay ta ngusay na, nga njam anda ata ta ngusay daa ba. <sup>30</sup> Ndøhay masa fa tøwam na, nga njam anda ata daa matøway daa ba. Ndøhay daa meesømey, nga njam anda ata daa meesømey daa ba. Ndøhay ma høðkam cek, nga njam anda cek hay masa ata ma høðkamata ha ngene na, ara ngada ata ba. <sup>31</sup> Ndøhay ma kam sløra ta cek hay da bøla keðe, nga njam anda ata fa kam sløra ta cek hay a

---

7:23 7.23 6.20    7:25 7.25 1Tm 1.12-14    7:26 7.26 Jer 16.1-4; SNM 14.22;  
1Tes 1.6; 3.3-4    7:28 7.28 Lk 21.23    7:29 7.29-31 Rm 13.11-13; 1Pi 4.7;  
Føl 4.5

daa ba. Ya lɔvkwar anda keɗe, maja bɛla keɗe fa da njeɣ ga daa ba.

<sup>32</sup> Ya wuɗey na, ray akwar a hɔbey ba. Ndaw masa ta ley ɲgwas daa ba na, mewulkey aɲga aa da ray Bay Mahura, a wuɗey ɲga key cek ma mbafar a Bay Mahura.

<sup>33</sup> Ama ndaw masa ta ɲgwas na, mewulkey aɲga aa da ray cek hay da bɛla, a wuɗey ɲga key cek ɲga mbafar a ɲgwas aɲga. <sup>34</sup> Anda keɗe, lenɲesl aɲga fa hɔbey. Asaya, ɲgwas manjar zel, da daa ba, sabara na, mewulkey aɲga aa da ray Bay Mahura. A wuɗey ɲga vɔlda mevel aɲga ta vaw aɲga cɔpa a Gazlavay. ɲgwas masa ta zel na, mewulkey aɲga aa da ray cek hay da bɛla. A wuɗey ɲga kar cek ma mbafar a zel e.

<sup>35</sup> Yaa guzlkwar anda keɗe na, ɲga jɔnkwar, ba na, a key ya tɔkakwar ɗay ba. Ama ya wuɗey na, ka kam cek ta cɔved e, asaya, ka kamar slɔra a Bay Mahura ta mevel pal.

<sup>36</sup> Ya wuɗey ɲgaa guzlkwar wure keɗe da ray bɔz-gula ta kwakwa aɲga masa ta larawa a way daa ba araɲ. Da bɔz-gula ha, a wulkey aɲga fa kar cek maaya ba a kwakwa aɲga, maja fa zɔnar vaw ɲga larawa, asaya, da aɲga fa wuɗey ɲga neɣ ta aɲga na, ɲga larawa a way aɲga anda aa ma wuɗey, ara mebɔrey ba. <sup>37</sup> Ama da bɔz-gula ha fa wulkey daa ray aɲga, a lɔvey, maaya na, a la kwakwa aɲga ba, asaya, da ndaw a tɔkar ɗay ba, da a bɔsa ɲga njeɣ kɔne na, ɲgene, ara cek maaya. <sup>38</sup> Yaw, ndaw ma ley kwakwa na, a key ɲgene, a key cek maaya. Ndaw ma ley kwakwa ba na, a key ɲgene, a key cek maaya ma fɔna saya.

<sup>39</sup> ɲgwas masa zel e ta mɔceɣ daa ba araɲ na, aɲga ta cɔved ɲga ley zel mekele daa ba. Ama da zel e ta mɔceɣ sem na, aɲga ta cɔved ɲga ley zel mekele anda aa mewuɗey, ama ɲga ley na, ndaw masa ma tɔba meɣ



nga Yesu \*Køriste. <sup>40</sup> Ama fa yah na, ngama a ley zel ba, maja da anga pal taava anga na, a da njeɣ maaya maaya da ray masa anga da way zel. Keɗe he ara mewulkey aɗaw. Ya wulkey yah may, yah ndaw masa ta \*Mesəfney nga Gazlavay da ray.

## 8

### *Mey da ray aslaw nga kuley*

<sup>1</sup> Wure keɗe na, ya daa guzley da ray aslaw nga kuley. Fara fara, aləkwa tabiya, ya sərkwā cek anda akwar ma ləvam. Mesərey cek na, fa zlapadata ndəhay. Ama mewuɗey-vaw na, fa vəltar gədaŋ a ndəhay daa \*mecəmey-ray nga ndəhay nga Yesu. <sup>2</sup> Da ndaw a zlepey, a wulkey a sərey cek kalah, ŋgene, cek masa Gazlavay ma wuɗey na, a səra ba araŋ. <sup>3</sup> Ama ndaw ma wuɗa Gazlavay ta mevel anga pal na, Gazlavay a səra ndaw aha.

<sup>4</sup> Yaw, aslaw nga kuley na, ya zəmkwa daw? Ya zəmkwa ba daw? Ya sərkwā kuley na, ara cek nga tede. Asaya, ya sərkwā Bay Gazlavay na, anga pal. <sup>5</sup> Fara fara, cek hay da gazlavay da vaɗ ta da bəla daha masa ndəhay fa ragadamatar anda ŋgada Gazlavay. Cek hay a na, ara kuley hay. Kuley hay a na, ata ga. Asaya, bay hay mekele mekele daha fa wam da ray ndəhay, anda ata na, gazlavay nga ndəhay a. <sup>6</sup> Ama ŋgada aləkwa na, Gazlavay anga pal letek, ara Papa aləkwa. Cek hay tabiya da bəla na, ara anga ma katərwa. Menjey aləkwa na, ara ŋgada anga. Bay Mahura na, anga pal may, ara Yesu \*Køriste.

---

7:39 7.39 Rm 7.2-3 8:1 8.1 SNM 15.29; Rm 12.16; mewuɗey-vaw: 13.1-7; 14.1; 16.14; Jaŋ 13.34; Rm 15.1-2; 2Kwr 8.7-8, 24; Gal 6.10; Ef 5.2 8:1 8.1-13 Rm 14.1-15.6 8:3 8.3 13.12; Gal 4.9 8:4 8.4 10.19-20; Mew 4.35, 39; 6.4-5; Gal 4.8-9

Gazlavay a katərwa cek hay tabiya ta fa anğa. Ara anğa ma vəndakwar heter.

<sup>7</sup> Ama ndəhay siya da wuzlah akwar a sərmara mey masa fara fara ha keđe ba. Haa wure keđe fa zəmam aslaw nğa kuley, anda ata fa tam kuley cənğa. Ata ta gədan daa cəved nğa Gazlavay daa ba aranj. Maja ngene, a wulkam aslaw nğa kuley masa ata ma zəmamara na, ta nəsta sem fa mey nğa Gazlavay. <sup>8</sup> Sərmara, cek mezəmey na, fa da tərđandakwar nğa ndəhay maaya fa mey nğa Gazlavay na, daa ba. Da ya zəmkwa aslaw nğa kuley na, a jənndakwar ba, da ya zəmkwa ba na, a nəsey cek ba may.

<sup>9</sup> Akwar na, ta cəved nğa zəmey kwa meeme anda akwar ma wudam. Ama pam lenjesl! Da daa ba, ndəhay masa ta gədan pəreh daa mey nğa Gazlavay na, a da kam mebərey maja akwar. <sup>10</sup> Yaw, wulkey da ray ndaw masa ta gədan pəreh daa mey nğa Gazlavay. Da a hətka, kah, ndaw masa ma səra cek, ka fa zəmey aslaw daa way nğa kuley na, ngene, a həlda ndaw aha nğa zəmey aslaw nğa kuley a daa ba daw? <sup>11</sup> Maja ngene, məlmakw masa ta gədan pəreh ngene, masa Kəriste ma məcey maja anğa na, a da zlenğedey daa cəved masa maaya maja mesərey cek akah ha ngene. <sup>12</sup> Da akwar fa kamara kəne na, ngene a key ka kamatar cek maaya ba a məlmakw akwar hay masa ta gədan pəreh, asaya, a key ka dakalamatara mevel ata. Ka kam cek maaya ba ngene na, nğada məlmakw akwar hay daada ba, ama a key ka kamar cek maaya ba nğada Kəriste ray anğa may. <sup>13</sup> Maja ngene, da məлма adaw a zlenğedey daa cəved masa maaya maja cek masa yah ma zəma na, ngene, ya fa da zəmey aslaw daa saba səlak amba məлма adaw a zlenğedey ba.

---

8:6 8.6 12.5-6; Jan 1.3-4; Ef 4.5-6; Kwa 1.16

8:7 8.7-12 10.23-33

8:8

8.8-9 Rm 14.13, 15, 17, 21; Gal 5.13

## 9

*Mey da ray ndəhay meslərey nga Yesu*

<sup>1</sup> Yah na, ndaw ma waya ba, ya key cek anda yah ma wudɛy, ba diya? Yah na, \*ndaw-meslərey nga Yesu. Ya ta hətər Bay aləkwa Mahura Yesu la ta dey aɗaw \*, ba diya? Fara fara, ara maja sləra aɗaw ngada Bay Mahura Yesu, akwar ma təbmarə mey aŋga. <sup>2</sup> Kwa da ndəhay siya a təbmarə yah na, ndaw-meslərey nga Yesu ba, ama akwar na, ka sərmara fara fara yah ndaw-meslərey nga Yesu. Akwar macəmkaya ta Bay Mahura Yesu maja yah ma wuzdakwara \*Mey-maaya-mawiya. ɲgene, fa wuzdərwa yah na, ndaw-meslərey nga Yesu fara fara.

<sup>3</sup> Ndəhay maa guzlam mey maaya ba a ray aɗaw na, ya da mbəɗɗatara ngada ata, ya ləvtar: <sup>4</sup> yah ta cəvedɗ nga hətəy cek mezəmey ta nga sey cek maja sləra masa yah ma ka, ba daw? <sup>5</sup> Ndəhay meslərey hay mekele nga Bay Mahura Yesu \*Kəriste ta məlmaha hay lej \*Piyer ata ta ɲgusay, fa pəkam bama. Kaa yah na, ta cəvedɗ nga ley ɲgwas ma təba mey nga Yesu, ya pəkam cew e, ba daw? <sup>6</sup> Ma da key sləra nga hətəy cek mezəmey na, si ala ta \*Barnabas gway daw? <sup>7</sup> Ndaw-sewje ma hətəy mawurɓay nga sləra aŋga ba, daha daw? Ndaw ma rəvey wudez, cek ma təkə nga zəmey babəza nga wudez e daha daw? Mecəkwer nga gənaɗ hay, cek ma təkə nga sey ɗəwa nga gənaɗ hay a daha daw?

---

\* 9:1 9.1 Gazlavay a wuzar cek a Pawl, a hətər Bay Mahura daa masa aŋga fa dərəy dangay da Jeruzelem. (SNM 22.14, 18; Gal 1.16) 9:1 9.1-2 4.9, 15; 15.8-10; 2Kwr 2.14-17; 3.1-3; 5.18-20; 10.7-8, 13; 11.5, 13; 12.11-13; Gal 1.1 9:4 9.4 Lk 10.7-8; Mt 10.10 9:6 9.6 Barnabas: SNM 4.36; 11.22-26; sləra masa Pawl ma key nga hətəy cek mezəmey: SNM 18.3

<sup>8</sup> Mey masa yah maa guzlda keɗe na, ara mewulkey nga ndəhay magədaŋ daada ba, kwa \*kwakwas nga Mawiz na, faa guzley kəne may. <sup>9</sup> Mawiz ta wuzleley la, a ləvey: «Daa masa sla fa key sləra da ley na, ka da par bebeŋ a mey ba.» Ka wulkam, Gazlavay fa wulkey na, da ray sla hay daada daw? <sup>10</sup> Kay, kəne ba! Gazlavay aa guzley anda keɗe na, ŋgada aləkwa. Ndaw mehəvey na, a wulkey a da hətəy cek mezəmey. Maaya na, a zəmey cek masa ŋga ma həva ha may. Ndaw ma ɗəgey daw na, maaya na, a zəmey daw a may. <sup>11</sup> Ala fa wuzdamakwara mey nga Gazlavay anda ndaw ma sləkey hulfad a ley. Yaw, da ka vəlmandar cek maja na, a kafakwar kalah daw? <sup>12</sup> Da ndəhay mekele ata ta cəved ŋga hətəy cek mezəmey fa akwar na, ala may, ala ta cəved ŋga hətəy cek mezəmey fa akwar ma fənta, ba diya? Anja ŋga key na, kəne, ama kwa ala taa cəɗafamakwar cek ŋga jəndar daa ba. Sasəkar jak, banay hay tabiya na, ala fa ɗəsmara, maja ala ta wuɗam ŋga key cek ma təkta ndəhay ŋga cəndamara Mey-maaya-mawiya da ray Kəriste na, daa ba.

<sup>13</sup> Ka sərmara ndəhay ma ka sləra daa \*Way-mekey-kwakwas ŋga Gazlavay na, fa hətam cek mezəmey fa sləra masa ata ma kamara ha ŋgene. Ndəhay ma hərəm gənaw ŋga vələy a Gazlavay na, a gwamara ŋga zəmam aslaw masa ata ma vəldamara a Gazlavay a ŋgene may. <sup>14</sup> Anja letək kəne ŋgada ndəhay ma wuzdamara Mey-maaya-mawiya may, maja Bay aləkwa Mahura Yesu ta ləvey la, ndəhay ma wuzdamara Mey-maaya-mawiya na, ŋga hətam cek mezəmey fa sləra ata ha.

<sup>15</sup> Ama, yah na, ya taa cəɗɗey cek daa ba sələk. Ka wulkam ya wuzlalakwara leeter keɗe na, amba ka

9:9 9.9 Mew 25.4; 1Kwr 10.11; 1Tm 5.18      9:11 9.11 9.4; Rm 15.27; Gal 6.6

9:12 9.12 SNM 20.34-35; 2Kwr 11.9      9:13 9.13 Mesl 18.8-19      9:14 9.14

slørmaya cek daw? Kay, kəne ba! Da yaa cəfdafakwar cek maja sløra aɗaw na, kwa ya fa da hətəy cek amba ya zlepey daa saba. Anda keɗe, ŋgama yah ma məcey.

<sup>16</sup> ŋgada yah na, mewuzey Mey-maaya-mawiya ara cek amba ya zlepey ta aŋga ba, maja ara sløra masa Gazlavay ma təkya ɗay ŋga ka. Da ya wuzda Mey-maaya-mawiya ha ba na, banay a hətəfaya la. <sup>17</sup> Da ara mewulkey aɗaw taava aɗaw ŋga wuzey Mey-maaya-mawiya a ndəhay na, anja ŋgene na, maaya a pəlmiwa mawurbay ŋga sløra aɗaw. Ama ara Gazlavay ma təkya ɗay ŋga ka sløra ha. Anda keɗe, ya key na, sløra masa mavəldakaya ŋgada yah ŋga key gway. <sup>18</sup> Kaa, mawurbay aɗaw na, daa ba daw? Mawurbay aɗaw na, daha. Ara mewuzey Mey-maaya-mawiya ŋga tede. Yah ta cəved ŋgaa cəfdafatar cek hay fa ndəhay maja ya fa wuzda Mey-maaya-mawiya, ama kwa ya taa cəfdəy cek daa ba səlak.

*Mey da ray Mey-maaya-mawiya ma daw fa mey fa mey*

<sup>19</sup> Yah na, kwa ndaw ma təkya ɗay ŋga key cek na, daa ba. Ama, ya ta vəlda ray aɗaw la ŋga tərey beke ŋga ndəhay tabiya amba ya jəney ndəhay ga ma fəna ma fəna ŋga təbey mey da ray Yesu \*Kəriste. <sup>20</sup> Daa masa yah da wuzlah \*Jəwif hay na, ya njey, ya key cek anda ata ma kamara, amba ya jənta ŋga təbey mey da ray Yesu Kəriste. Kwakwas ŋga \*Mawiz na, aŋga ta gədan da ray aɗaw daa ba, ama da yah da wuzlah ndəhay ma səpa kwakwas a na, si ya key cek anda ata ma kamara, amba ya jənta ŋga təbey mey da ray Yesu Kəriste. <sup>21</sup> Da yah da wuzlah ndəhay ma səpam kwakwas ŋga Mawiz ba na, ya key cek anda ata ma kamara, amba ya jənta ŋga təbey

---

9:15 9.15 SNM 18.3    9:16 9.16 Jer 20.9    9:17 9.17 4.1    9:19 9.19 Mt 20.26-27    9:19 9.19-22 10.23-24, 32-33; Rm 15.1    9:20 9.20 SNM 16.3; 21.20-26

mey da ray Kəriste may. Ya ta ləvey ya səpa \*mewey nga Gazlavay ba na, daa ba, maja fara fara, ya fa səpa mewey nga Kəriste. <sup>22</sup> Daa masa yah da wuzlah ndəhay ma təba mey nga Yesu masa ta gədaŋ pəreh na, si ya key cek anda ata ma kamara, amba ya jənta nga təbey mey da ray Yesu Kəriste. Ya kata cek hay wal wal tabiya anda ndəhay tabiya ma kamara, amba ndəhay mekele mekele a ləham. <sup>23</sup> Ya kata cek hay a tabiya keđe na, amba \*Mey-maaya-mawiya a daw fa mey fa mey, asaya, amba Gazlavay a pəsyə mey, anda aŋga ma pəstar mey a ndəhay mekele may.

<sup>24</sup> Daa kwakurda nga mahway na, ndəhay ga ma hwam, ama ndaw ma da key bay-gula nga hətəy cek na, ndaw pal gway. Yaw, akwar may, kam gədaŋ nga hway anda bay-gula daa kwakurda ha amba ka hətəy cek. <sup>25</sup> Kwa waawa ma wudey nga key kwakurda na, si a vəlda ray aŋga, a mbəkdata cek hay mekele mekele ma nəsa ndaw, aa sərkey maaya maaya la dʒagay. A vəlda ray aŋga anda keđe na, nga key bay-gula, nga hətəy cek. Ama cek masa aŋga ma da hətəy fa mawurbay aŋga ŋgene na, fa da njeý ga daa ba. Aləkwa na, ya vəldakwa ray aləkwa anda ŋgene amba ya hətəy cek masa ma da njeý nga sərmataw. <sup>26</sup> Maja ŋgene, yah na, ya hway saw daa kwakurda ba. Asaya, yah na, anda ndaw mewedeý har. Har adaw a daw a ley ba. <sup>27</sup> Yah na, ya fa sərda banay ta vaw adaw, ya fa kəta vaw adaw ta gədaŋ ta gədaŋ, ya fa wey da ray vaw adaw amba yah, ndaw masa ma wuzda Mey-maaya-mawiya a ndəhay na, Gazlavay a kəzlaya ta cakay ba.

---

9:21 9.21 Gal 2.3-4    9:22 9.22 Rm 1.13; 2Kwr 5.11; 11.29    9:24 9.24-25  
 Fəl 3.12-14; 2Tm 2.4-6; 4.7-8; Jak 1.12; 1Pi 5.4; CWJ 2.10  
 9:27 9.27 Rm 8.13; 13.14

## 10

*Mey da ray kuley hay*

<sup>1</sup> Məlma aɗaw hay, ya wuɗɗey ka sərfadamara cek masa Gazlavay ma ka ta papaŋ ŋga papa aləkwa hay zleezle daa masa ata fa səpmar wurzay ŋga \*Mawiz. Gazlavay ta sərtata la ta mekwtene \* tabiya ata. Asaya, ata tabiya ta zləŋgam la ta daa Bəlay Magaza. <sup>2</sup> Ata tabiya, Gazlavay ta katar \*baptem la daa mekwtene leŋ daa bəlay a, amba a cəmta ta Mawiz. <sup>3</sup> Ata tabiya, ta zəmam cek ma sawa ta fa Gazlavay la daa slam a, <sup>4</sup> asaya, ta sam yam ma sawa ta fa Gazlavay la may. Yam masa ata ma samara ha na, a bawa daa pəraɗ masa Gazlavay ma vəldatara. Pəraɗ aha fa daw asi ata. Pəraɗ aha na, ara \*Kəriste. <sup>5</sup> Ta ŋgene he cəpa, ndəhay ga da wuzlah ata, a kam cek ma mbafar a Gazlavay ba. Maja ŋgene, ta məcam sem da wuzlah-ley.

<sup>6</sup> Cek hay a ma kam ŋgene na, a pandakwar leŋgesl amba cek hay malamba masa papaŋ ŋga papa aləkwa hay ma kamara ŋgene na, ya kakwa ba. <sup>7</sup> Ndəhay siya da wuzlah ata ta tam kuley hay la. Aŋga letək anda ma wuzlalakaya zleezle daa ɗerewel ŋga Gazlavay, a ləvey: «Da mey kuley, ndəhay a njam ŋga zəmey cek ta ŋga sey wuzam. Fa dəba ha, a lacam, a gərvam da mey kuley a.» † Akwar na, ka da tam kuley anda ata ba. <sup>8</sup> Ndəhay siya da wuzlah ata ta lam vaw saw la da palah, maja ŋgene,

---

\* 10:1 10.1 Nəka Mab 13.21 ta 14.22-29. Mekwtene he a wuzwa Gazlavay aa ta ata. Mezləŋgey bəlay a wuzwa Gazlavay ma ləhdata sem. 10:1 10.1 Mab 13.21; 14.21-29 10:3 10.3 Mab 16.13-35; Mew 8.3; Ps 78.24-25 10:4 10.4 Mab 17.6; Mesl 20.11; Ps 78.15 10:5 10.5 Mesl 14.29-30; Ps 78.31; Heb 3.17; Jud 5 10:6 10.6 Mesl 11.4, 34; Ps 106.14 † 10:7 10.7 Megərvay ata ŋgene, a həldata ŋga ley vaw saw da palah. Nəka Mab 32.6.

ndøhay gabal kwakwar cew a ray a maakar (23.000) ta møcam la pas pal. Aløkwa na, ya da lakwa vaw saw da palah anda ata ba. <sup>9</sup> Ndøhay siya da wuzlah ata ta jadamara Bay Gazlavay la, haa zezekw hay a zamata, ta', a møcam. Aløkwa na, ya da jadakwa Bay Mahura Køriste anda ata ma jadamara Bay Gazlavay ba. <sup>10</sup> Ndøhay siya da wuzlah ata taa nguram mey la †, maja ngene, maslan nga Bay Gazlavay masa ma køðey ndaw vagay ta køðta sem vagay. Akwar na, ka daa nguram mey anda ata ba.

<sup>11</sup> Cek hay maaya ba ma høtfatar papaŋ nga papa aløkwa hay a ngene na, amba ndøhay a pam lenjesl. Ta wuzlalamata cek hay a ma kam ngene la aa ðerewel nga Gazlavay amba a pandakwar lenjesl, aløkwa masa ta dey da bøla masa fa da ndøvey keðe. <sup>12</sup> Maja ngene, ndaw ma wulkey aa majarakaya na, si a wey vaw, da daa ba na, a da tøðey. <sup>13</sup> Banay ma sawa a ray akwar nga jadakwar na, aa letek ta banay ma sawa a ray ndøhay tabiya. Gazlavay na, cek masa aa ma løvey a ka la na, a ka fara fara. Gazlavay a, a jønkwar la, anda keðe, cek ma da jadakwar nga fønkwar ta gøðan daa ba. Da masa banay fa sawa a ray akwar nga jadakwar na, Gazlavay a da vølkwar gøðan amba ka bøsmara banay a, asaya, a vølkwar cøved amba ka løham.

<sup>14</sup> Anda keðe, jam aðaw hay, hwam dørej ta kuley hay. <sup>15</sup> Yaa guzlkwar anda keðe kaa na, maja ya søra akwar ndøhay ta lenjesl. Mey masa yah maa guzlda keðe na, ara mey fara fara. Akwar ta ray akwar, wulkam da ray mey a cey! <sup>16</sup> Daa masa aløkwa fa zømkwa ðaf nga sørfedey memøcey nga Køriste na, aløkwa fa kakwa suse

---

10:8 10.8 Mesl 25.1-9    10:9 10.9 Mesl 21.5-6    † 10:10 10.10 Nøka  
 Mesl 16.41; 17.5, 10.    10:10 10.10 Mesl 14.2, 36; 16.41; 17.6-15; Ps  
 106.25-27; Heb 3.17-18    10:11 10.11 7.29-31; Rm 15.4    10:12 10.12 Gal  
 6.1    10:13 10.13 1.9; Jak 1.13-14    10:14 10.14 1Jŋ 5.21



a Gazlavay maja cek mesey daa voley, ya sərkwā aləkwa macəmkaya ta Kərīste maja mambaz aᅅga. Daa masa aləkwa fa zəmkwa peᅅ na, ya sərkwā aləkwa macəmkaya ta Kərīste maja vaw aᅅga. <sup>17</sup> Ma zəmamara peᅅ e na, aləkwa ga, ama peᅅ e na, aᅅga pal gway. Maja ᅅgene, aləkwa macəmkaya pal.

<sup>18</sup> Wulkam da ray ndəhay \*Israyel hay zleezle, ata fa hərəm gəᅅaw hay da ray slam-mefəkey cek a Gazlavay. Ndəhay ma zəmam aslaw mavəldakaya ᅅgada Gazlavay na, ata macəmkaya ta Gazlavay. <sup>19</sup> Yaw, mey a keᅅe, a wuᅅey ᅅga ləvey na, kwara? A wuᅅey ᅅga ləvey, kuley ta aslaw ᅅga kuley a na, ara cek hay fara fara ba. <sup>20</sup> Ama da ndəhay ma sərmara Gazlavay ba fa tam kuley na, a vəldamara aslaw a, a mesəfney maaya ba hay, ba na, a Gazlavay ba. Ya wuᅅey na, ka cəmam ta mesəfney maaya ba hay a ba. <sup>21</sup> Ka sam cek masa mavəldakaya ᅅgada mesəfney maaya ba hay, asaya, ka sam cek ᅅga sərfeᅅey meməcey ᅅga Bay Mahura saya na, kwara? Ka zəmam ᅅaf masa mavəldakaya ᅅgada mesəfney maaya ba hay, asaya, ka zəmam ᅅaf ᅅga sərfeᅅey meməcey ᅅga Bay Mahura saya na, kwara? <sup>22</sup> Da ya kakwa kəᅅe na, Bay Mahura a da ceᅅ mevel a ray aləkwa, ba diya? Ka wulkam na, ya fəᅅkwa Bay Mahura ta gəᅅaᅅ daw?

*Mey da ray cek ma da jəᅅta* ndəhay ᅅga səpeᅅ mey ᅅga Gazlavay

<sup>23</sup> Ndəhay siya da wuzlah akwar, fa wulkam, a ləvam: «Cek matəkakaya ᅅga key na, daa ba.» Ahaw, fara, cek matəkakaya daa ba, ama cek hay tabiya maaya ᅅga key ba. «Cek matəkakaya ᅅga key na, daa ba.» Ama cek hay

---

10:16 10.16 11.24-25; Lk 22.17-20    10:17 10.17 12.27    10:18 10.18 Lev 7.11-21    10:19 10.19 8.4    10:20 10.20 Mew 32.17; Ps 106.37; CWJ 9.20  
10:21 10.21 2Kwr 6.15-16    10:22 10.22 Mew 32.21

tabiya a gwamara nga jɔnmata ndɔhay daa \*mecɔmey-ray nga ndɔhay nga Yesu ba. <sup>24</sup> Ka da nɔkam dey fa cek hay ma jɔnmakwar daada ba, ama nɔkam dey fa cek hay ma jɔnam ndɔhay mekele may.

<sup>25</sup> Aslaw tabiya masa akwar ma hɔtam daa luma na, ka gwamara nga hɔɔkamara, ka zɔmamara. Ka da wulkam da ray a ba sɔlak, ka daa cɔɔɔamara ara aslaw nga me ba. <sup>26</sup> Yaa guzley anda keɔɔe na, maja mawuzlalakaya daa ɔerewel nga Gazlavay, a lɔvey: «Bɔla ta cek hay da hwaɔ a tabiya na, ara nga Bay Gazlavay.»

<sup>27</sup> Anda keɔɔe, da ndaw ma tɔɔba mey nga Yesu \*Kɔriste ba ta zɔlkwar la nga zɔmey ɔaf da way anɔga, da akwar ma tɔɔmara la nga daw a way anɔga ha na, ɔaf masa ata ma vɔldamakwara na, zɔmamara, ka da wulkam da ray a ba sɔlak, ka daa cɔɔɔamara ara aslaw nga me ba. <sup>28</sup> Ama da ndaw a lɔvkwar: «Aslaw keɔɔe, ara aslaw nga kuley» na, nɔgene, ka da zɔmamara ba. Ka zɔmamara ba maja ndaw ma kadakwara nɔgene, a da wulkey. <sup>29</sup> Yaa guzley na, maja mewulkey akwar ba, ama maja mewulkey nga ndaw aha. Fara fara, cek matɔkakaya nga zɔmey na, daa ba. Kaa, ya da key cek anda mewulkey nga ndaw mekele na, maja me? <sup>30</sup> Da ya zɔmey cek na, ya kar suse a Gazlavay maja cek aha. Kaa ndaw aa guzley maaya ba da ray aɔaw maja yah ma zɔma cek masa yah ma kar suse sem a Gazlavay maja na, kwara?

<sup>31</sup> Maja nɔgene, kwa ka zɔmam cek, kwa ka sam cek, kwa ka kam cek wura wura na, kamara amba slɔmay nga Bay Gazlavay a zɔley. <sup>32</sup> Ka da kam cek masa ma hɔldata ndɔhay nga kam mebɔrey ba, kwa nɔgada ndɔhay \*Jɔwif

---

10:23 10.23 6.12; 8.7-12 10:23 10.23-33 Rm 14.1-15.6 10:24 10.24  
 10.32; 13.5; Rm 15.1-2; Fɔl 2.4 10:25 10.25 Rm 14.2 10:26 10.26 Ps  
 24.1; 89.12 10:28 10.28 8.7 10:30 10.30 Rm 14.6; 1Tm 4.4 10:31  
 10.31 Kwa 3.17

hay, kwa ngada ndəhay masa Jəwif hay ba hay, kwa ngada ndəhay daa mecəmey-ray nga ndəhay nga Yesu, ka da kam ba. <sup>33</sup> Njam anda yah, cek hay tabiya masa yah ma ka na, ya wudəy amba a mbafatar a ndəhay tabiya. Ya nəkey dey na, fa cek ma da jənya yah taava aɗaw ba, ama ya fa nəkey dey fa cek ma da jəney ndəhay ga may, amba Gazlavay a ləhdata daa mebərey.

## 11

<sup>1</sup> Yah na, ya fa key cek anda Kəriste. Akwar may, kam cek anda yah ma ka.

*Mey da ray ngwas ta zel fa mey nga Gazlavay*

<sup>2</sup> Ya fa həlmakwar maja akwar fa sərfadamaya mandaw mandaw, asaya, maja akwar fa kamata cek hay anda yah maa sərkadakwara.

<sup>3</sup> Ama ya wudəy na, ka sərmara, \*Kəriste na, anga \*bay-ray nga ndəhay tabiya, zel na, anga bay-ray nga ngwas anga, Gazlavay may, anga bay-ray nga Kəriste.

<sup>4</sup> Da ndaw-mezəle fa dərar dangay a Gazlavay, asaya, fa wuzey mey nga Gazlavay fa mey nga ndəhay ta jikwew da ray na, ngene a key a rəsa Kəriste, ndaw masa ma wa.

<sup>5</sup> Ngwas may, da anga fa dərar dangay a Gazlavay, da daa ba, fa wuzey mey nga Gazlavay fa mey nga ndəhay na, a da mbəkda ray ɓa' kəne ba, nga jəwey adikwaw a ray, da daa ba na, a key ngene, a rəsa zel e. Ngwas aha na, hwaray a da kar anda ngwas masa ray mahəjkaya. <sup>6</sup> Da ngwas a jəwey adikwaw a ray ba na, nga həja ray \* anga. Ama, maja mehəjey ray, da daa ba, mesley ray, a key hwaray na, ngene nga jəwey adikwaw a ray.

---

10:32 10.32 Rm 14.13 10:33 10.33 9.19-22 11:1 11.1 4.16 11:2  
11.2 2Tes 2.15; 3.6 11:3 11.3 3.23; MC 3.16; Ef 5.23 \* 11:6 11.6 a həja  
ray: a həza ray

<sup>7</sup> Da ndaw-mezøle fa da dərar dangay a Gazlavay na, a da pey jikwew a ray ba, maja anğa na, a lawa Gazlavay, asaya, aa fa wuzdərwa gədanŋ nga Gazlavay. Ama ŋgwas na, aa fa wuzdərwa gədanŋ nga zel e. <sup>8</sup> Gazlavay ta ley tetesl daa vaw ŋga ŋgwas ŋga ləmey ndaw-mezøle na, daa ba. Ama a ley na, tetesl daa vaw ŋga ndaw-mezøle ŋga ləmey ŋgwas. <sup>9</sup> Gazlavay ta ləma ndaw-mezøle maja ŋgwas na, daa ba, ama a ləma ŋgwas maja ndaw-mezøle. <sup>10</sup> Maja ŋgene, ŋgwas na, si a jəwey adikwaw a ray maja maslanŋ hay ŋga Gazlavay † da vad. Mejəwey adikwaw a ray ŋgene a wuzwa anğa fa nar ray a zel e. <sup>11</sup> Ama daa menjey aləkwa ta Bay Mahura na, ŋgwas a wa ray anğa ba, ndaw-mezøle may, a wa ray anğa ba. <sup>12</sup> Kwa Gazlavay a ləma ŋgwas ta tetesl ŋga ndaw-mezøle na, ama ara ŋgwas ma yarawa ndaw-mezøle cəŋga. Ata cewete na, ara Gazlavay ma ləmtərwa, Gazlavay masa ma katərwa cek hay tabiya.

<sup>13</sup> Akwar ta ray akwar, wulkam cey: ŋgwas na, a dərar dangay a Gazlavay ray ba' kəne fa mey ŋga ndəhay na, maaya daw? <sup>14</sup> Kwa waawa a səra da ndaw-mezøle anğa ta engwec fa ray ga na, ara hwaray ŋgada ndaw aha. <sup>15</sup> Ama ŋgwas, da anğa ta engwec fa ray səlep səlep na, ara cek maaya kalah ŋgada anğa, maja Gazlavay a vəldara engwec maazəma na, amba a bərɗa ray anğa. <sup>16</sup> Da ndaw fa key yawa da ray mey a na, si a səra kwakwas ala mekele da ray mey a keɗe na, daa ba. Kwa kwakwas mekele ŋga ndəhay

---

11:7 11.7 MC 1.26-27 11:8 11.8-9 MC 2.18-23; 1Tm 2.13 † 11:10 11.10  
 maja maslanŋ hay ŋga Gazlavay: Ndəhay a wulkam Pawl a wuɗey  
 ŋga ləvey maslanŋ hay ŋga Gazlavay na, ata da wuzlah  
 ndəhay daa medərey-dangay. Anda keɗe, a wuɗam cek  
 hay tabiya a kam ta cəved e. Ndəhay mekele a wulkam  
 a ləvam maslanŋ hay na, fa sərtamara ray ata fa mey ŋga  
 Gazlavay may. Nəka Iz 6.2.

daa \*mecəmey-ray hay nga Yesu da ray mey a na, daa ba may.

*Mey da ray mezəmey* ɗaf nga sərfeɗey meməcey nga Bay Mahura Yesu

*(Matiye 26.26-29; Mark 14.22-25; Luk 22.14-20)*

<sup>17</sup> Ehe, ya wuɗey ngaa guzlkwar mey mekele daha. Ya fa da kakwar suse maja mey a daa ba. Mekusey akwar tabiya na, fa ɗiykwar daa ba, ama a key a nəskwar jak.

<sup>18</sup> Cek ngeeme na, ya fa cənda fa ndəhay, a ləvam daa mekusey akwar nga dərey dangay a Gazlavay na, akwar fa walam vaw ta weley da wuzlah akwar. Ya wulkey taa slam lanɗar na, akwar fa kamara kəne fara. <sup>19</sup> Yaw, maaya na, mewuɗkey-ɗay a key da wuzlah akwar amba ndəhay ma səpmara mey nga Yesu ta cəveɗ e, a səram kwa.

<sup>20</sup> Daa mekusey akwar akwar fa zəmam ɗaf, ama ara nga sərfeɗey meməcey nga Bay Mahura fara fara ba, <sup>21</sup> maja kwa waawa fa wusey vaw nga zəma ɗaf anɗa. Anda keɗe, ndəhay siya, may fa catar, ama siya hay, fa wam. <sup>22</sup> Akwar na, ta way akwar hay, ba diya? Zəmatərwa ɗaf a, samatərwa cek akwar hay a da way akwar hay gway taw. Ka wuɗam nga rəsmata ndəhay daa mecəmey-ray nga ndəhay nga Yesu daw? Ka wuɗam nga pamatar hwaray a ndəhay masa-viya hay daw? Ka wuɗam yaa guzlkwar na, kwara? Ka wulkam na, ya kakwar suse la daw? Kay! Ya fa da kakwar suse daa ba səlak.

<sup>23</sup> Cek masa yah maa sərkaɗakwara keɗe na, ara Bay Mahura Yesu maa sərkaɗiwa. Dasi tavaɗ masa ata ma da vəldamara Bay Mahura Yesu a har masa-gəra anɗa hay nga sərɗamara banay na, Yesu a, leɗ! a ley peɗ, <sup>24</sup> a kar suse a Gazlavay maja, a wunka, ta', aa guzley, a ləvey:

«Kedde he, ara vaw adaw mavoldakaya ngada akwar. Kamara anda kedde amba ka sɔrfadamaya.» <sup>25</sup> Masa ata ma ndovdamara mezəmey daf la na, lej! a la voley ta cek mesey da hwaɗ a, ta', aa guzley saya, a ləvey: «Kedde he na, ara mambaz adaw. Ta fa mambaz a, Gazlavay a jəwey mey mawiya ta ndəhay anga hay. Da akwar fa da samara na, kamara anda yah ma ka kedde amba ka sɔrfadamaya.»

<sup>26</sup> Anda kedde, ta pas masa akwar fa zəmamara peɲ kedde ta akwar fa samara cek aha kedde na, ngene, akwar fa wuzdamara mey da ray meməcey nga Bay Mahura, dəga wure kedde haa kasl ma vəhwa anga.

<sup>27</sup> Anda kedde, da ndaw a zəma peɲ, a sa cek mesey nga Bay Mahura saw saw na, a key ngene, a key mebərey maja anga ma rəsa vaw ta mambaz nga Bay Mahura ha.

<sup>28</sup> Da ray ngene, si ndaw a nəka ray anga la dɔgay, fa dəba ha, a gwa nga zəmey peɲ e, ta nga sey cek mesey a.

<sup>29</sup> Ndaw ma zəma peɲ ta ma sey cek mesey a ta meney ray ba na, ngene, ta wulkey da ray meməcey nga Bay Mahura daa ba. Anda kedde, Gazlavay a da ceɲ mevel da ray a. <sup>30</sup> Ara maja ngene, masa-macay hay ta masa-bəle hay ga da wuzlah akwar daha. Asaya, siya hay ga ta məcam sem. <sup>31</sup> Da kwa waawa da wuzlah aləkwa a nəka ray anga la dɔgay, wara cay a zəmey daf nga sɔrfedey meməcey nga Bay Mahura na, ngene, Gazlavay fa da ceɲ mevel a ray aləkwa daa ba. <sup>32</sup> Ama, da Bay Gazlavay fa sɔrdandakwar banay na, a key ngene, a kətndakwar amba ta pas masa Gazlavay ma da katar sariya a ndəhay da bəla na, sariya ha, a kərzandakwar anda ndəhay siya hay ba.

<sup>33</sup> Anda kedde, məlma adaw hay, da masa akwar ta

---

11:25 11.25 mejəwey-mey: Jer 31.31-34; Lk 22.20; 2Kwr 3.6; Heb 8.6; mambaz: Mab 24.6-8; Heb 9.12 11:26 11.26 Mt 26.29

11:27 11.27 11.20-22; Heb 10.29 11:28 11.28 2Kwr 13.5 11:32 11.32 Heb 12.5-6; CWJ 3.19

kusam la ɲga zəmey ɗaf ɲga sərfeɗey meməcey ɲga Bay Mahura na, səkwam vaw da wuzlah akwar la ɗagay. <sup>34</sup> Da ndaw may fa car na, ɲga zəmwa ɗaf da way aɲga la ɗagay, amba daa masa akwar makustakaya na, Gazlavay a cey mevel a ray akwar ba. Da ray mey hay mekele na, da masa ya ta wusey la fa akwar na, ya ɗiyta mey hay a la.

## 12

*Mey da ray* gəɗaɲ masa Mesəfney ɲga Gazlavay ma vɔldatara a ndəhay

<sup>1</sup> Məlma aɗaw hay, wure keɗe ya daa guzlkwar da ray gəɗaɲ mekele mekele masa \*Mesəfney ɲga Gazlavay ma vɔlda ɲgada ndaw a, ndaw a maja mewuɗey-vaw aɲga. Ya wuɗey na, ka cəndamara mey da ray gəɗaɲ a maaya maaya. <sup>2</sup> Ka sərmarara daa masa akwar ta tərām ndəhay ɲga Yesu \*Kəriste daa ba araj na, akwar fa tam kuley hay. Kuley hay na, aa guzlam ba, ama akwar fa vɔldamara ray akwar a kuley hay ɲga wamakwar ma fəna ma fəna, ka gwamara ɲga jaram ba. <sup>3</sup> Maja ɲgene, ya wuɗey na, ka sərmarara fara fara, da ndaw aɲga ta Mesəfney ɲga Gazlavay da ray a na, ndaw aha, a gwa ɲgaa guzley, a ləvey: «Kuse! Yesu ɲga nəsey» na, daa ba. Ama, da ndaw aa guzley, a ləvey: «Yesu ara Bay aləkwa Mahura» na, ɲgene, ndaw aha aa guzley ta gəɗaɲ ɲga Mesəfney ɲga Gazlavay.

<sup>4</sup> Gəɗaɲ masa Mesəfney ɲga Gazlavay ma vɔldatara a ndəhay ɲga key sləra aɲga na, a wuzwa wal wal fa ndaw a fa ndaw a, ama ara Mesəfney a pal ɲgene ma vɔldatara a ndəhay. <sup>5</sup> Sləra hay masa Bay Mahura Yesu ma vɔldatara ɲgada ndəhay na, ata wal wal may, ama ya

---

12:2 12.2 8.4-6; Iz 44.9-20; Gal 4.8      12:3 12.3 1Jɲ 4.2-3; Rm 10.9      12:4  
12.4-11 12.27-14.40; Rm 12.6-8; Ef 4.4

kakwa sløra ngada Bay Mahura pal gway. <sup>6</sup> Gazlavay a vøltar gødan wal wal ngada ndøhay nga key sløra anga, ama ara Gazlavay pal ma vølda gødan nga key sløra hay a tabiya.

<sup>7</sup> Gødan nga Mesøfney nga Gazlavay fa wuzwa vaw wal wal ngada kwa waawa da wuzlah akwar. A key anda ngene na, nga jøney ndøhay tabiya. <sup>8</sup> Mesøfney nga Gazlavay a vølar lenjesl maaya ngada ndaw ngaa guzley maaya. Ngada ndaw lanjar, Mesøfney a, a vølar gødan nga sørey cek hay amba a wuzdatara a ndøhay. <sup>9</sup> Ngada ndaw lanjar saya, Mesøfney nga Gazlavay a vølar gødan nga tøbey mey nga Yesu fara fara aa mevel anga. A søra a gwa a key cek ma fønə gødan anga ta fa Mesøfney nga Gazlavay a. Ngada ndaw mekele, Mesøfney nga Gazlavay a vølar gødan nga mbøley masa-macay hay. Ara Mesøfney nga Gazlavay a pal ngene ma vølda gødan nga key sløra hay a. <sup>10</sup> A vølar ngada ndaw lanjar gødan nga key maazla hay. Ngada ndaw mekele, a vølar gødan nga tøley mey masa Gazlavay ma wuzdara. Ngada ndaw mekele, a vølar gødan nga sørey sløra nga Mesøfney nga Gazlavay ta nga sørey sløra nga mesøfney maaya ba. Ngada ndaw lanjar saya, a vølar gødan ngaa guzley ta mey hay mekele mekele masa anga ma cønə ba. Ngada ndaw lanjar saya, a vølar gødan nga mbøfdey mey masa ndaw ma cønə ba. <sup>11</sup> Ara Mesøfney nga Gazlavay a pal taava anga ma gwa nga vølda gødan nga key sløra hay a tabiya. Mesøfney a, a wunkey gødan mekele mekele anda aa ma wufey ngada kwa waawa.

*Mey da ray mecømey-ray nga ndøhay nga Køriste*



<sup>12</sup> Yaw, vaw nga ndaw-magədan na, anga pal, ama mezəvey hay mekele mekele daha. Kwa mezəvey hay ga fa ndaw daha, ama vaw na, anga pal gway. \*Kəriste na, aa kəne may. <sup>13</sup> Daa masa aləkwa ma hətkwa \*baptem na, aləkwa tabiya ta tərkwā vaw pal sem ta gədan nga \*Mesəfney nga Gazlavay pal. Aləkwa tabiya, kwa \*Jəwif hay, kwa ndəhay masa Jəwif hay ba, kwa beke hay, kwa beke hay ba, Gazlavay a vəlndakwar na, Mesəfney anga ha ngene pal.

<sup>14</sup> Vaw nga ndaw na, anga ta mezəvey pal daada ba, ama anga ta mezəvey hay ga. <sup>15</sup> Da salay a ləvey: «Yah mezəvey nga vaw ba maja yah na, har ba», kwa da aa guzley kəne na, anga mezəvey nga vaw ba fara daw? <sup>16</sup> Da sləmay a ləvey: «Yah mezəvey nga vaw ba, maja yah na, dey ba», kwa da aa guzley kəne na, anga mezəvey nga vaw ba fara daw? <sup>17</sup> Da vaw nga ndaw ara dey daada na, ngene ndaw aha a da jəkey sləmay ta me? Da vaw nga ndaw, ara sləmay daada na, ngene ndaw aha a da cənda mezey nga cek hay ta me? <sup>18</sup> Ama Gazlavay ta katərwa mezəvey hay nga vaw la tabiya aa slam anga, aa slam anga, anda aa ma wudfey. <sup>19</sup> Da Gazlavay a pey mezəvey nga vaw pal daada na, ngene, ara vaw ba. <sup>20</sup> Ya sərkwā, mezəvey hay nga vaw na, ata ga, ama vaw na, anga pal gway.

<sup>21</sup> Anda keḏe, dey a gwa a ləvey: «Walay aḏaw ta har daa ba» na, kəne ba. Asaya, ray a gwa a ləvey: «Walay aḏaw ta salay daa ba» na, kəne ba. <sup>22</sup> Sasəkar jak, mezəvey nga vaw masa kah ma pa nga cek nga tede ngene, da mezəvey a daa ba na, ka məcey. <sup>23</sup> Mezəvey hay nga vaw masa ma mbafandakwar ba na, ya wakwa vaw ta anga jak, ba diya? Mezəvey hay nga vaw masa aləkwa ma ḃadatakwa fa dey nga ndəhay na, ya pakwa lenḡesl

kalah na, a ray ata jak, ba diya? <sup>24</sup> Mezəvey hay nga vaw masa ma mbam na, nga ata, ya pakwa lenghesl a ray ata ba. Gazlavay a pata mezəvey nga vaw nga ndaw cəpa, a həsltar ray. A həsltar ray ma fəna na, ngada mezəvey hay masa ma nəkam anda cek nga tede. <sup>25</sup> A patərwa mezəvey hay tabiya aa slam a na, amba vaw a wunkey ba, asaya, amba mezəvey hay a jənam vaw da wuzlah ata. <sup>26</sup> Da mezəvey nga vaw pal fa sərey banay na, mezəvey hay nga vaw tabiya a səram banay asiya may. Da fa həslmar ray a mezəvey nga vaw pal na, mezəvey hay siya tabiya aa səmam may.

<sup>27</sup> Yaw, akwar na, vaw nga Kəriste. Kwa waawa na, anga mezəvey pal nga vaw nga Kəriste he. <sup>28</sup> Daa \*mecəmey-ray nga ndəhay nga Yesu na, Gazlavay ta pey ndəhay la mekele mekele nga key sləra anga. Ngeeme na, a pey ndəhay meslərey nga Yesu. Nga dey cew e na, a pey ndəhay ma təla mey anga. Nga dey maakar a na, a pey ndəhay maa sərkada ndəhay. Asaya, ngada ndəhay mekele a vəltar gədan nga key maazla hay. Ngada ndəhay mekele, a vəltar gədan nga mbəley masa-macay hay. Ngada ndəhay mekele, a vəltar gədan nga jəney ndəhay. Ngada ndəhay mekele, a vəltar gədan nga key \*bay-ray. Ngada ndəhay mekele saya, a vəltar gədan ngaa guzley ta mey hay mekele mekele masa ata ma sərmara ba. <sup>29</sup> Ndəhay tabiya na, ata ndəhay meslərey nga Yesu daw? Ndəhay tabiya na, fa təlam mey nga Gazlavay daw? Ndəhay tabiya na, faa sərkadamatara mey nga Gazlavay a ndəhay daw? Ndəhay tabiya na, fa kam maazla hay daw? <sup>30</sup> Ndəhay tabiya na, fa mbəlam ndəhay daa macay daw? Ndəhay tabiya na, faa guzlam ta mey hay masa ata ma

---

12:26 12.26 Rm 12.15; 2Kwr 11.29 12:27 12.27 6.15; 10.17; 12.12; Rm 12.4-5; Ef 4.4, 16; 5.30 12:28 12.28 12.8-10; 14.1-4; SNM 13.1; 15.32; Ef 4.11-12

sərmara ba daw? Ndəhay tabiya na, fa mbəḏdamara mey hay masa ndəhay ma cəndamara ba a ndəhay mekele daw? <sup>31</sup> Ama sləra hay masa Mesəfney ŋga Gazlavay ma vəldatara a ndəhay ma fənta siya hay na, kamara ta mevel pal.

*Mey da ray mewuḏfey-vaw*

Wure keḏe, ya da wuzkwar cəved maaya ma fənta cəved hay mekele.

## 13

<sup>1</sup> Kwa yaa guzley ta mey hay mekele mekele, kwa yaa guzley ta mey ŋga maslan hay ŋga Gazlavay, ama da ya wuḏfey ndaw ba na, ŋgene, yah na, letek ta gwanḡwanḡw, da daa ba, ta mawiyar ma wurzley sləmay. <sup>2</sup> Da Gazlavay a vəlya gədan ŋga təley mey aŋga a ndəhay, kwa ya sərta cek hay tabiya, kwa ya cənda mey hay ŋga Gazlavay masa maḡadatakaya, kwa ya təḡba mey ŋga Gazlavay kalah haa ya gwa ya ləvar ŋgada aŋgwa: «Sləkḏey, daw», fa dəḡba ha, aŋgwa ha a daw na, kwa ta ŋgene he cəpa, da ya wuḏfey ndaw ba na, ŋgene, yah cek ŋga tede. <sup>3</sup> Da ya wunkatara cek aḏaw hay tabiya a ndəhay masa-viya hay, kwa da ya vəlda ray aḏaw ŋga wewurey maja ndəhay, ama da ya wuḏfey ndaw ba na, ŋgene kwa fa da jənya daa ba.

<sup>4</sup> Ndaw ma wuḏfey ndaw na, a ḡəsta ndəhay tabiya, a key cek hay maaya ŋgada ndəhay, a key sələn fa ndəhay ba, a zlepey ba, a gəlda ray aŋga ba. <sup>5</sup> Ndaw ma wuḏfey ndaw na, a key cek ma ka hwaray ba, a wulkey da ray cek hay ŋgada aŋga taava aŋga ba, a cey mevel ba, a pey mey aa mevel ba. <sup>6</sup> Ndaw ma wuḏfey ndaw na, aa səmey da

---

12:31 12.31 14.1 13:1 13.1 2Kwr 12.3-4 13:1 13.1-7 8.1; Rm 13.8-10  
13:2 13.2 12.8; Mt 7.22; 17.20 13:3 13.3 Dan 3.19-20; Mt 19.21 13:5  
13.5 10.33; MM 10.12; Fəl 2.4

ray cek hay maaya ba hay ba, ama aa sɔmey da ray cek hay masa maaya fara fara. <sup>7</sup> Ndaw ma wuɗɗey ndaw na, a ɓɔsa cek ma key maaya ba tabiya fa mey aŋga, a wuzda ba, a tɔɓa mey ŋga Gazlavay mandaw mandaw, a wulkey Gazlavay a da ɗiyta cek hay tabiya, asaya, a ɓɔsta cek hay wura wura cɔpa.

<sup>8</sup> Mewuɗɗey-vaw na, fa da ndɔvey daa ba sɔlak. Ama, metɔley-mey ŋga Gazlavay na, a ndɔvey la. Gɔɗaŋ ŋgaa guzley mey hay mekele mekele masa ndɔhay ma cɔndamara ba na, a ndɔvey la. Yaw, mesɔrey-cek may, a ndɔvey la. <sup>9</sup> Fara fara, cek hay a, a ndɔvam la, maja mesɔrey-cek alɔkwa ta metɔley-mey ŋga Gazlavay na, a wuzdatɔrwa cek hay cɔpa ba, si nekɔɗɗey gway. <sup>10</sup> Ama ta pas masa Gazlavay ma da wuzdandakwara cek masa maaya tabiya na, cek masa alɔkwa ma sɔrkwa nekɔɗɗey heyey na, a ndɔvey la.

<sup>11</sup> Daa masa yah daa bɔzey na, ya faa guzley anda bɔza hay, ya fa wulkey anda bɔza hay, asaya, ya fa cɔndata cek hay anda bɔza hay. Ama wure keɗe na, ya ta tɔrey ndaw mahura sem, ya ta mbɔkda mekey cek hay anda bɔza hay sem. <sup>12</sup> Wure keɗe, alɔkwa fa hɔtmatakwa cek hay maaya maaya daa ba, ya nɔktakwa cek hay anda ndaw ma nɔkey cek daa baŋgɔra manɔskaya. Ama pas pal na, ya da hɔtmatakwa cek hay tabiya fa dey alɔkwa maaya maaya. Wure keɗe na, mesɔrey-cek aɗaw, aŋga nekɔɗɗey gway. Pas a, a wuswa la masa yah ma da sɔrta cek hay tabiya maaya maaya anda Gazlavay ma sɔrya maaya maaya keɗe may.

<sup>13</sup> Yaw, cek hay maakar daha fa da ndɔvam daa ba. Cek hay a na, ara metɔɓey-mey ŋga Gazlavay, mesɔkwey cek fa Gazlavay, leŋ mewuɗɗey-vaw. Cek hay maakar ata keɗe

na, fa da ndɔvam daa ba, ama cek mahura da wuzlah ata na, ara mewudɛy-vaw.

## 14

*Mey mekele saya da ray* gɔɗan masa Mesɔfney nga Gazlavay ma vɔldatara a ndɔhay

<sup>1</sup> Teesed na, sɔpam nga wudɛy vaw da wuzlah akwar. Asaya, vɔldamara ray akwar may nga hɔtey gɔɗan masa \*Mesɔfney nga Gazlavay ma vɔldatara ngada ndɔhay nga key slɔra anɓa. Vɔldamara ray akwar kalah na, nga hɔtey gɔɗan nga tɔley mey masa Gazlavay ma wuzdara ngada ndɔhay. <sup>2</sup> Ndaw maa guzley mey hay masa ma cɔney ba na, a key nɓene, aa guzlar a Gazlavay, ba na, aa guzley ngada ndɔhay ba, maja ndɔhay a cɔndamara mey masa anɓa maa guzlda ha ba. Aa guzley nɓene na, ta gɔɗan nga Mesɔfney nga Gazlavay, aa guzley da ray cek hay maɓadatakaya. <sup>3</sup> Ama \*ndaw ma tɔla mey masa Gazlavay ma wuzdara na, a key nɓene, aa guzlar a ndɔhay. Mey anɓa a vɔltar gɔɗan a ndɔhay, a jɔnta amba a tɔɓmara mey nga Gazlavay maaya maaya, asaya, a dɔktar mevel. <sup>4</sup> Ndaw maa guzley mey masa ndɔhay ma cɔndamara ba na, nɓene, mey a, a jɔney anɓa ray anɓa gway. Ndaw ma tɔla mey masa Gazlavay ma wuzdara na, a key nɓene, a jɔnta ndɔhay daa \*mecɔmey-ray nga ndɔhay nga Yesu tabiya.

<sup>5</sup> Ya wudɛy na, akwar tabiya, kaa guzlam ta mey masa ndɔhay ma cɔndamara ba, ama ya wudɛy ma fɔna saya na, ka tɔlam mey masa Gazlavay ma wuzdakwara may. Da ndaw aa guzley ta mey masa ndɔhay ma cɔndamara ba, maaya na, ndaw nga mbɔɗda mey a daha amba mey

a, a jənta ndəhay tabiya daa mecəmey-ray ŋga ndəhay ŋga Yesu. Da ndaw ŋga mbəɸda mey a daa ba na, ŋgene, ndaw ma təla mey masa Gazlavay ma wuzdara na, a jənta ndəhay a fəna ndaw maa guzley ta mey masa ndəhay ma cəndamara ba.

<sup>6</sup> Məlma aɸaw hay, da ya daw fa akwar, yaa guzlkwar ta mey mekele mekele masa akwar ma cəndamara ba, ŋgene, mey a, a da jənkwar na, kwara? Da ya kadakwara mey maɸadakaya ŋga Gazlavay ba, da ya wuzdakwara cek hay mekele ba, da ya təley mey masa Gazlavay ma wuzdiwa ba, asaya, da yaa sərkadakwar ba na, ŋgene, a key ya jənkwar daw?

<sup>7</sup> Anɣa letek ta cek hay ma ka walay anda sləlam ta ganjaval. Da ka fa sləlam saw na, ndaw a da cənda ɸay ŋga walay masa kah ma fa ha na, kwara? Da ka kəɸa ganjaval saw na, ndaw a da cənda ɸay ŋga walay masa kah ma kəɸa ha na, kwara? <sup>8</sup> Mefey taalam ŋga zəley ndəhay ŋgadaa vərəm na, kəne may. Da ndaw ma fa taalam a maaya maaya daa ba na, ndaw fa da sərə ara madaw ŋgadaa vərəm na, daa ba. <sup>9</sup> ŋgada akwar may kəne. Da kaa guzlam mey masa ndəhay ma cəndamara ba, ndəhay a da cəndamara mey masa akwar maa guzldamara ha na, kwara? Anda keɸe, mey akwar a, a da tərey ŋga cek ŋga tede.

<sup>10</sup> Mey hay mekele mekele ga daha da bəla. Kwa səkway wura wura faa guzley ta mey anɣa na, a cənda.

<sup>11</sup> Anda keɸe, da ndaw aa guzlya ta mey anɣa, ama ya cənda mey a ba na, ndaw a ŋgene anɣa ndaw-məlak fa mey aɸaw. Yah may, yah məlak fa mey anɣa. <sup>12</sup> Yaw, maja akwar fa wuɸam ŋga hətey gədaŋ ŋga key slərə hay masa Mesəfney ŋga Gazlavay ma vəldatara ŋgada ndəhay anɣa hay na, maaya na, ka səpam ŋga hətey teesəɸ na,

gədanŋ ŋga key sləra hay ma gwa ŋga jənmata ndəhay daa mecəmey-ray ŋga ndəhay ŋga Yesu.

<sup>13</sup> Maja ŋgene, ndaw masa ta gədanŋ ŋga guzley ta mey masa ndəhay ma cəndamara ba na, ŋga dərey danŋay a Gazlavay amba Mesəfney ŋga Gazlavay a vəlar gədanŋ ŋga mbəɸda mey a ta mey masa ndəhay ma cəndamara. <sup>14</sup> Da ya dərər danŋay a Gazlavay ta mey masa yah ma cənda ba na, fara fara mevel aɸaw fa dərey danŋay, ama yah na, kwa ya cənda ba səlak.

<sup>15</sup> Anda keɸe, ya da key na, kwara? Ya da dərey danŋay ta mey masa yah ma cənda ba ta gədanŋ ŋga Mesəfney ŋga Gazlavay, asaya, ya da dərey danŋay ta mey aɸaw ta leŋgesl aɸaw may. Ya da zley walay ta mey masa yah ma cənda ba ta gədanŋ ŋga Mesəfney ŋga Gazlavay, asaya, ya da zley walay ta mey aɸaw ta leŋgesl aɸaw may. <sup>16</sup> Da kah, ka fa kar suse a Gazlavay ta mey masa ndəhay ma cəndamara ba na, ndaw ma səra mey ŋga Gazlavay ba da wuzlah akwar na, a gwa ŋga təba, a ləvey: «\*Amen» na, kwara? A gwa ba, maja a cənda mey masa kah maa guzlda ha ba. <sup>17</sup> Kwa ka fa kar suse a Gazlavay maaya maaya daa medərey-danŋay a na, ama medərey-danŋay a, a gwa ŋga jəna ndaw aha ba.

<sup>18</sup> Ya fa kar suse a Gazlavay maja ya faa guzley mey hay ga masa ndəhay ma cəndamara ba a fənkwar. <sup>19</sup> Ama, da masa yah da wuzlah ndəhay ŋga Yesu makustakaya na, ŋgama yah maa guzley mey pal ta mey masa ndəhay ma cəndamara amba yaa sərkadata, da ray yah ma daa guzley ga ta mey masa ndəhay ma cəndamara ba.

<sup>20</sup> Məlma aɸaw hay, daa menjey akwar na, ka da wulkam anda bəza hay ba, ama wulkam anda ndəhay ma sərmara mey ŋga Gazlavay maaya maaya. Ka da kam cek malamba daa sləra akwar ba. Təram anda bəza hay da

mey dƿowa masa ma sɔrmara ɲga key cek malamba ba.

<sup>21</sup> Mawuzlalakaya daa dɛrewel ɲga Gazlavay, a lɔvey:

«Bay Gazlavay a lɔvey:

“Ya daa guzltar a ndɔhay aɗaw hay ta mey  
masa ata ma cɔndamara ba.

Ahaw, ya daa guzltar ta mey ɲga ndɔhay  
daa hwayak mekele.

Ama ta ɲgene he cɔpa na, ndɔhay aɗaw hay  
fa da jɔkfamaya slɔmay daa ba cɔɲga.”»

<sup>22</sup> Anda keɗe, ɲgada ndɔhay ma tɔba mey ɲga Yesu  
ba, meeguzley ta mey masa ndɔhay ma cɔndamara ba na,  
ara cek ma wuzwa ɲgada ata, Gazlavay a katar sariya la.  
ɲgada ndɔhay ma tɔba mey ɲga Yesu na, kɔne ba. ɲgada  
ata, metɔley-mey ɲga Gazlavay na, ara cek ma wuzwa  
Gazlavay aa da wuzlah ata. ɲgada ndɔhay ma tɔba mey  
ɲga Yesu ba na, kɔne ba.

<sup>23</sup> Wulkam cey: da masa akwar ndɔhay ɲga Gazlavay  
makustakaya tabiya, ndɔhay ma tɔba mey ɲga Yesu ba,  
da daa ba, ndɔhay ma samawa ɲga jɔkam slɔmay saw  
a samawa a wuzlah akwar, a hɔtfamakwar akwar faa  
guzlam ta mey hay masa ndɔhay ma cɔndamara ba na, a  
padamakwar ɲga ndɔhay ta malula da ray, daa ba daw?

<sup>24</sup> Ama da akwar tabiya fa tɔlam mey masa Gazlavay  
ma wuzdakwara, ndɔhay ma tɔba mey ɲga Yesu ba ta  
ndɔhay ma samawa ɲga jɔkam slɔmay saw a samawa,  
a hɔtfamakwar na, mey a, a da wuzdatara mebɔrey ata.  
Asaya, mey akwar a, a da vɔltar mewulkey da ray menjey  
ata maaya ba, <sup>25</sup> cek hay maɓadatakaya daa mevel ata, a da  
wuzwa a palah. Maja ɲgene, a da ragadamar a Gazlavay, a  
da hɔlmamara, asaya, a da lɔvam: «Fara fara, Gazlavay aa  
da wuzlah akwar.»



*Mekey cek ta cøved* e daa mecømey-ray nga ndøhay nga Yesu

<sup>26</sup> Maja ηgene, mølma adlaw hay daa \*mecømey-ray nga ndøhay nga Yesu, ka da kam na, kwara? Da masa akwar makustakaya daa slam a na, ndaw pal da wuzlah akwar nga zley walay, ndaw mekele ηгаа sørkadata ndøhay ta mey nga Gazlavay, ndaw mekele ηгаа wuzda cek masa Gazlavay ma wuzdara a ndøhay, ndaw mekele ηгаа guzley ta mey masa ndøhay ma cøndamara ba, ndaw mekele saya nga mbøfda mey a, a ndøhay. Ka kamata cek hay tabiya ηgene na, nga jøney ndøhay daa mecømey-ray nga ndøhay nga Yesu amba a diyam fa mey fa mey. <sup>27</sup> Da ndaw aa guzley ta mey masa ndøhay ma cøndamara ba na, ndøhay cew, da daa ba, maakar gway ηгаа guzlam pal pal, ndaw pal nga mbøfda mey masa ata maa guzdamara ha a ndøhay. <sup>28</sup> Da ndaw nga mbøfda mey a daa ba na, ηgene, ndaw maa guzley ta mey masa ndøhay ma cøndamara ba ha na, a daa guzley ta gødaη fa mey nga ndøhay ba, ama ηгаа guzley da hwað da hwað ηgada ray anηa ta ηgada Gazlavay gway.

<sup>29</sup> ηgada ndøhay ma tøla mey nga Gazlavay na, ndøhay cew, da daa ba, maakar ηгаа guzlam gway, ndøhay siya na, nga jøkam slømay da mey a ara mey nga Gazlavay fara fara kwa. <sup>30</sup> Daa masa ndaw masa faa guzley na, da Gazlavay a wuzar mey a ndaw mekele daa mekusey akwar na, maaya na, ndaw masa ηgeeme a njej teete ðagay. <sup>31</sup> Akwar tabiya akwar, akwar ta cøved nga tøley mey nga Gazlavay, ama gwaguzlam pal pal amba ndøhay tabiya aa sørkam maaya maaya, asaya, amba a høtam gødaη. <sup>32</sup> Ndaw masa aa ta gødaη nga tøley mey nga Gazlavay na, ara anηa ma wey da ray gødaη aha, <sup>33</sup> maja mekey cek ta

cøved e ba na, a mbafar a Gazlavay ba. Gazlavay a wudëy na, ya njakwa ta zazay.

Njam anda ndøhay daa mecømey-ray nga ndøhay nga Yesu siya. <sup>34</sup> Masa akwar makustakaya daa slam a na, ngusay nga njam teete. Ata ta cøved nga guzley daa ba, nga namatar ray a zel hay anda mawuzlalakaya daa \*mewey nga Gazlavay. <sup>35</sup> Da mey daha masa ata ma cøndamara ba na, a daa cøfdamara daa mekusey a ba, ama ngaa cøfdamata fa zel ata hay da way. Ngwas aa guzley daa mekusey nga ndøhay nga Yesu na, maaya ba.

<sup>36</sup> Ka wulkam mey nga Gazlavay a zlawana, fa akwar gway daw? Ka wulkam mey nga Gazlavay a wusey na, fa akwar daada daw? <sup>37</sup> Da ndaw a wulkey aa ta gødan nga \*Mesøfney nga Gazlavay, da daa ba, aa ta gødan nga wuzey mey nga Gazlavay na, nga søra, mey masa yah ma wuzlalakwara keðe na, ara mey masa Bay Mahura ma wuzdiwa. <sup>38</sup> Da ndaw aha a jøkey slømay fa mey masa yah ma wuzlalakwara keðe ba na, ngene, Gazlavay fa da søra ndaw aha daa ba.

<sup>39</sup> Da ray ngene, mølma adaw hay, søpam teesed na, gødan nga tøley mey nga Gazlavay. Asaya, da ndøhay faa guzlam ta mey hay masa ndøhay ma cøndamara ba na, ka da tøkmeta ba. <sup>40</sup> Cek masa mahura na, si ka kamata cek hay tabiya daa mekusey akwar maaya maaya, asaya, ka kamata ta cøved e.

## 15

*Mey da ray masløkðawa* nga Yesu Køriste daa memøcey

---

14:33 14.33 7.15 14:34 14.34-35 11.3; Ef 5.22; 1Tm 2.12 14:37 14.37  
1Jn 4.6 14:39 14.39 14.1, 5 14:40 14.40 14.33

<sup>1</sup> Məlma aɗaw hay, ya wuɗfey ŋгаа guzlkwar saya da ray \*Mey-maaya-mawiya masa yah ma wuzdakwara zleezle masa akwar ma təb̄mara. Ahaw, akwar ta təb̄mara mey a la fara fara aa mevel akwar. <sup>2</sup> Ta fa metəbey Mey-maaya-mawiya ha na, Gazlavay a ləhdakwar la, ama si akwar fa təb̄mara anda yah ma wuzdakwara, ka mbəkdamara ba. Da daa ba na, metəbey mey a ŋgada akwar na, ara cek ŋga tede.

<sup>3</sup> Ya taa sərkadakwara mey masa Yesu maa sərkaɗiwa la. Mey masa mahura da hwaɗf a na, ara \*Kəriste ma məcey maja mebərey aləkwa anda mawuzlalakaya daa ɗerewel ŋga Gazlavay. <sup>4</sup> Ta jəhmara la, ŋga ɗar maakar a ta sləkɗawa sem daa meməcey anda mawuzlalakaya daa ɗerewel ŋga Gazlavay. <sup>5</sup> Masa ŋga ma sləkɗawa cay daa meməcey a na, ta wuzar vaw la a \*Piyer, asaya, ta wuztar vaw la a ndəhay ŋga hay meslərey siya. <sup>6</sup> Fa dəba ha, ndəhay ŋga hay a fəna temere zlam ta hətmar la ata cəpa daa slam a may. Ndəhay ma hətmar na, har-gədaŋ da wuzlah ata, ata daha ta dey ɗagay, ama siya hay ta məcam sem. <sup>7</sup> Ta wuzar vaw la a \*Jak. Fa dəba ha, ta wuztar vaw la a ndəhay ŋga hay meslərey tabiya saya.

<sup>8</sup> Fa dəba ata tabiya, kwa yah anda bəzey masa ma yawa rav-baŋ na, ta wuzya vaw la may. <sup>9</sup> Dasi ndəhay meslərey ŋga Yesu Kəriste tabiya na, yah mecəhe da wuzlah ata. Yah na, ya wusa amba a zəlmaya \*ndaw-meslərey ba, maja ya ta sərdata banay la ta ndəhay daa \*mecəmey-ray ŋga ndəhay ŋga Yesu Kəriste. <sup>10</sup> Ama maja mepəsey-mey ŋga Gazlavay da ray aɗaw na, ya ta tərey ndaw masa

---

15:1 15.1 Gal 1.11    15:2 15.2 Gal 2.1-2    15:3 15.3 11.23; 1z 53.5-12    15:4 15.4 Jaw 1.17; Mt 12.40; Janj 20.9; SNM 2.24-31    15:5 15.5 Mt 28.16-17; Lk 24.34, 36; Janj 20.19    15:7 15.7 Lk 24.50    15:8 15.8 9.1; Gal 1.15-16; SNM 9.3-6    15:9 15.9 Ef 3.8; Gal 1.13-14    15:9 15.9-10 1Tm 1.12-16

akwar ma hətmar wure keɗe la. Mepəsey-mey aŋga ha na, ara cek ŋga tede ŋgada yah ba, sasəkar jak, ya ta key sləra la ga, ma fəna ndəhay meslərey mekele. Ma ka sləra ha na, ara yah ta gədaŋ aɗaw ba, ama fara fara ara maja mepəsey-mey ŋga Gazlavay aa da ray aɗaw. <sup>11</sup> Anda keɗe, kwa da ara yah ma wuzda Mey-maaya-mawiya, kwa da ara ndəhay meslərey mekele na, ara cek letek. Ala tabiya ala, ya wuzam mey letek masa akwar ma təbmaraa aa mevel akwar.

*Mey da ray ndəhay* ma da sləkɗamawa daa meməcey

<sup>12</sup> Ala fa wuzdamara ya ləvam \*Kəriste ta sləkɗawa sem daa meməcey. Kaa, ndəhay siya da wuzlah akwar a ləvam ndəhay fa da sləkɗamawa daa meməcey daa ba na, kwara? <sup>13</sup> Da fara fara ndəhay fa da sləkɗamawa daa meməcey daa ba na, ŋgene, Kəriste ta sləkɗawa daa meməcey daa ba may. <sup>14</sup> Da fara fara Kəriste ta sləkɗawa daa meməcey daa ba na, ŋgene, mey ŋga Gazlavay masa ala ma wuzdamara na, ara mey ŋga tede, ka təbmaraa mey a ŋga tede may.

<sup>15</sup> Da kəne na, ala ta mbərzlam sem a ray Gazlavay maja ala ta ləvmatar la a ndəhay, Gazlavay ta sləkɗadərwa Kəriste sem daa meməcey. Ama da ndəhay fa da sləkɗamawa daa meməcey daa ba na, ŋgene, Gazlavay ta sləkɗadərwa Kəriste daa meməcey daa ba may. <sup>16</sup> Da Gazlavay fa da sləkɗadatərwa ndəhay daa meməcey daa ba na, ŋgene, Kəriste may, Gazlavay ta sləkɗadərwa daa meməcey daa ba. <sup>17</sup> Da Gazlavay ta sləkɗadərwa Kəriste daa meməcey daa ba na, ŋgene, ka təbmaraa mey aŋga ŋga tede, asaya, akwar ta mebərəy cəŋga. <sup>18</sup> Anda meləvey saya, ndəhay ma təbmaraa mey ŋga Kəriste masa ma

mɔcam sem na, taa zɔɗam sem. <sup>19</sup> Da alɔkwa fa pakwa Kɔriste ŋga ndaw ma da jɔnnɔɗakwar fara fara, ama da a jɔnnɔɗakwar daa masa alɔkwa da bɔla daada na, ŋgene, anja matɔway daa dey alɔkwa a fɔna ŋga ndɔhay mekele la.

<sup>20</sup> Ama fara fara na, Kɔriste ta slɔkɗawa sem daa memɔcey. Anɓa na, ara ndaw masa ma slɔkɗawa teesɗɗ daa memɔcey. Anda keɗe, a wuzwa fara fara ndɔhay mekele a slɔkɗamawa la daa memɔcey may.

<sup>21</sup> Memɔcey a sawa a bɔla na, ta fa ndaw pal, mezɔley \*Adam. Yaw, ma wura cɔvedɗ amba ndɔhay a slɔkɗamawa daa memɔcey na, ara ndaw pal may, mezɔley Yesu Kɔriste. <sup>22</sup> Ndɔhay tabiya a mɔcam maja ata macɔmkaya ta Adam aha. Ama ndɔhay tabiya masa macɔmkaya ta Kɔriste na, a slɔkɗamawa la daa memɔcey anda anɓa may.

<sup>23</sup> Ama kwa waawa a da slɔkɗawa daa memɔcey na, fa dɔle fa dɔle. Kɔriste ta slɔkɗawa sem teesɗɗ daa memɔcey. Ta pas masa aa ma da vɔhwa na, ndɔhay anɓa hay a slɔkɗamawa la daa memɔcey may. <sup>24</sup> Fa dɔba ha, bɔla a ndɔvey la. Kɔriste a daa zɔɗɗata mesɔfnɛy hay maaya ba hay ta gɔɗar ŋga bay ata hay tabiya. A da key bay-gula da ray bay hay ma wam da bɔla. Fa dɔba ha, a da vɔldara bay anɓa a Gazlavay Papan aa slam a.

<sup>25</sup> Ama si Kɔriste a wey da ray cek hay tabiya haa kasl Gazlavay Papan ma pata masa-gɔra anɓa hay tabiya asi salay anɓa ɗagay. <sup>26</sup> Masa-gɔra ŋga madagway-dakw masa Gazlavay ma daa zɔɗɗa na, ara memɔcey.

<sup>27</sup> Yaw, mawuzlalakaya daa ɗerewel ŋga Gazlavay, a lɔvey:

---

15:18 15.18 1Tes 4.13 15:20 15.20 6.14; Kwa 1.18 15:21 15.21-22  
15.45-49; MC 3.17-19; Rm 5.12, 14, 18 15:22 15.22 2Kwr 5.17 15:23  
15.23 15.51-52; 1Tes 4.16 15:24 15.24 Dan 2.44 15:25 15.25 Ps 110.1;  
Mt 22.44 15:26 15.26 CWJ 1.18; 20.14; 21.4

«Gazlavay ta pata cek hay tabiya la asi har nga Bøzey annga.» Ahaw, mawuzlalakaya anda ngene, ama fara fara, Gazlavay na, fa da njeý asi har nga Bøzey annga daa ba, maja ara annga ma pata cek hay tabiya asi har nga Bøzey annga ha. <sup>28</sup> Masa Gazlavay Papanj ta pata cek hay tabiya cay asi har nga Bøzey annga na, Bøzey annga ha may, a da vølda ray annga asi har nga Papaha masa ma vøldara cek hay tabiya. Anda keðe, Gazlavay Papanj a da wey maaya maaya da ray cek hay tabiya.

<sup>29</sup> Wulkam da ray ndøhay siya da wuzlah akwar ma høtam \*baptem maja ndøhay mamøctakaya cey. Da fara fara ndøhay mamøctakaya a sløkðamawa daa memøcey daa ba na, a høtam baptem maja ndøhay mamøctakaya na, maja me?

<sup>30</sup> Asaya, da ndøhay mamøctakaya fa sløkðamawa daa ba na, ala ta ray ala, ya fa vøldamara ray ala nga sørey banay mandaw mandaw na, maja me? <sup>31</sup> Ahaw, mandaw mandaw ya fa høtar memøcey ta dey aðaw. Mølma aðaw hay, ya kadakwara cek hay tabiya keðe na, maja fara fara ya faa sømey da ray akwar, akwar masa macømkaya ta Yesu Køriste Bay aløkwa Mahura. <sup>32</sup> Feðe da Efez, masagøra hay ga daha, ya ta køðey vaw la ta ata anda ta cek hay nga ley masa-høma. Da ya køðey vaw anda ngene maja mewulkey nga ndaw-magøðan daada na, mekøðeyvaw a, a da jønya na, kwara? Da ndøhay mamøctakaya a sløkðamawa daa ba na, ngene, a key anda mey daha ma løvey: «Zømkwa cek, sakwa cek, mandaw na, aløkwa daa saba.» <sup>33</sup> Pam lenjesl, maja da akwar fa pøkam ta ndøhay ma kam cek malamba na, akwar may ka kam cek malamba la anda ata. <sup>34</sup> Kam cek ta cøved e, ka da kam

cek malamba saba. Ndøhay siya da wuzlah akwar daha masa ma sørmara Gazlavay ba. Yaa guzlkwar anda keðe na, nga pakwar hwaray.

*Mey da ray vaw nga ndaw ma sløkfawa* daa memøcey

<sup>35</sup> Da kwa ndaw a gwa a wulkey daa ray anga, a løvey: «Gazlavay a da sløkfadørwa ndaw daa memøcey na, kwara? Vaw nga ndaw ma sløkfawa daa memøcey, a da nøkey na, kwara?» <sup>36</sup> Ndaw ma wulkey anda ngenene na, ara ndaw manjar lenge. Hulfað masa kah ma sløka a ley na, a pøcwa ama masa masløkakaya cøma na, a zey.

<sup>37</sup> Hulfað masa kah ma sløka, kwa ara daw, kwa ara meeme na, ka sløkey na, babøza daada gway, ka sløka ta panay a tabiya ba. <sup>38</sup> Hulfað hay na, ata wal wal, gwaslaf hay a may, ata wal wal. Masa kah ma sløka la na, Gazlavay a pøcrawa, a key gwaslaf anda Gazlavay ma wuðey.

<sup>39</sup> Cek hay tabiya masa ta mesøfney na, ata ta vaw wal wal may. Anda meløvey, vaw nga ndaw-magøðarø na, anga wal ta nga gønaw hay, wal ta nga ðiyarø hay, asaya, wal ta nga ewet hay.

<sup>40</sup> Cek hay da gazlavay da vað daha, cek hay da bøla daha may. Membey nga cek hay da gazlavay da vað anga wal ta membey nga cek hay da bøla. <sup>41</sup> Mewedey nga pas na, anga wal, mewedey nga kiya na, anga wal may. Mewedey nga wurzla hay anga wal saya, kwa da wuzlah wurzla hay na, mewedey ata wal wal.

<sup>42</sup> Masløkfawa daa memøcey na, køne may. Vagay masa ta pøshamara cay na, anga anda hulfað, a da zey. Vaw masa ma sløkfawa daa memøcey na, fa da zey daa ba sølak. <sup>43</sup> Masa ta pøshamara vagay cay aa cøvay na, vagay a, a da zey, ara cek nga tede, asaya, a mbey fa dey

ba. Ama masa ta sləkɗawa cay daa memɔcey na, a zey ba, a njeɣ aŋga ta gədaŋ, asaya, a mbey fa dey kalah. <sup>44</sup> Da a pəsham vagay na, a pəsham ŋgene, aslaw ŋga vaw gway. Masa ta sləkɗawa cay na, a tɔrey vaw masa \*Mesəfney ŋga Gazlavay ma ləma mawiya. Aləkwa ta vaw da bəla keɗe, ba diya? Sərmara, ya hət kwa vaw mekele la masa Mesəfney ŋga Gazlavay ma ləma. <sup>45</sup> Ara anda mawu-zlalakaya daa ɗerewel ŋga Gazlavay, ma ləvey: «\*Adam masa ŋgeeme na, ara ndaw-magədaŋ masa Gazlavay ma vɔlar heter.» Adam masa ŋga madagway-dakw na, ara \*Kəriste ma tɔrey ŋga Mesəfney ma vɔltar heter mawiya a ndəhay.

<sup>46</sup> Vaw masa Mesəfney ŋga Gazlavay ma ləma na, ara vaw ŋgeeme ba. Anda keɗe, masa ŋgeeme na, ara vaw ŋga ndaw-magədaŋ da bəla keɗe ɗagay, fa dɔba ha, vaw masa Mesəfney ŋga Gazlavay ma ləma. <sup>47</sup> Adam, ndaw ŋgeeme na, ara ndaw-magədaŋ masa Gazlavay ma ləma ta hwiyak. Ama Adam ŋga dey cew e na, a pawa salay da gazlavay da vadɗ. <sup>48</sup> Ndəhay magədaŋ na, vaw ata anda vaw ŋga ndaw masa Gazlavay ma ləma ta hwiyak. Ndəhay da gazlavay da vadɗ na, vaw ata anda vaw ŋga ndaw ma pawa salay da gazlavay da vadɗ may. <sup>49</sup> Wure keɗe na, vaw aləkwa anda vaw ŋga ndaw masa Gazlavay ma ləma ta hwiyak. Pas pal na, vaw aləkwa a da tɔrey anda vaw ŋga ndaw ma pawa salay da gazlavay da vadɗ.

<sup>50</sup> Məlma aɗaw hay, ya fa ləvkwar, aa slam masa Gazlavay fa wey da vadɗ na, ndaw fa da mbəzey a hwaɗ a ta vaw masa da bəla keɗe daa ba. Cek hay ma da zam na, a gwa ŋga cəmam ta cek hay ma da njam ŋga sərmataw ba.

---

15:43 15.43 Fəɓ 3.20-21 15:45 15.45 MC 2.7; Jan 6.63; 2Kwr 3.6, 17  
15:45 15.45-49 15.21-22 15:49 15.49 MC 5.3



<sup>51</sup> Jøkam sləmay, ya daa guzlkwar da ray cek maβadakaya \*: ndəhay siya da wuzlah aləkwa tabiya fa da məcam daa ba, ama aləkwa tabiya, vaw aləkwa a da mbədey. <sup>52</sup> A da key na, daa masa fa famara taalam ŋga madagway-dakw. Vaw aləkwa a da mbədey fiyaw fiyaw anda ndaw ma kəbcey dey. Masa ta famara taalam cay na, ndəhay maməctakaya a sləkɔamawa la daa meməcey ta vaw masa ma da məcey saba. Aləkwa siya masa ta dey, aləkwa tabiya vaw aləkwa a da mbədey.

<sup>53</sup> Anda meləvey, vaw aləkwa ma da zey na, a da tərey ŋga vaw ma da zey saba. Ahaw, vaw aləkwa ma da məcey na, a da tərey ŋga vaw ma da məcey saba.

<sup>54</sup> Masa vaw aləkwa ta mbədey cay kəne na, ŋgene, mey mawuzlalakaya daa ɔerewel ŋga Gazlavay a da key fara fara anda mawuzlalakaya ha. Mey a, a ləvey: «Meməcey daa saba, Gazlavay ta fəna meməcey sem ta gədaŋ.»

<sup>55</sup> «Haya, bay-meməcey, gədaŋ akah na,  
aŋga ama dəba ama?»

Haya, bay-meməcey, ləvat akah  
masa kah ma məlta ndəhay ta aŋga na,  
aŋga ama dəba ama?»

<sup>56</sup> Ləvat ma məlta ndəhay ŋga məcam na, ara mebərey. Kwakwas ŋga \*Mawiz na, fa vəlar gədaŋ a mebərey ŋgaa zəɔɔdata ndəhay. <sup>57</sup> Ama həlmakwa Gazlavay, maja ara aŋga ma vəlndakwar gədaŋ ŋga fəna meməcey ta fa Bay aləkwa Mahura Yesu Kəriste.

<sup>58</sup> Maja ŋgene, məlma aɔaw hay mawuɔtakaya, kam gədaŋ, kwa cek a da vəhdakwar ŋgada fa dəba ba.

---

\* 15:51 15.51 cek maβadakaya: Pawl aa guzley da ray pas masa Kəriste ma da vəhwa. 15:51 15.51 1Tes 4.15 15:52 15.52 taalam: Mt 24.31; 1Tes 4.16 15:53 15.53 2Kwr 5.4 15:54 15.54 Iz 25.8 15:55 15.55 Aw 13.14 15:56 15.56 Rm 4.15; 6.14 15:57 15.57 Rm 7.24-25

Kamara sløra nga Bay Mahura Yesu mandaw mandaw ta mevel pal. Ka sørmara sløra masa akwar ma kamara ta gødanj anga na, ara cek masa nga tede ba.

## 16

*Mey da ray mecekeley dala ngada ndøhay da Jeruzelem*

<sup>1</sup> Ya daa guzlkwar wure keðe na, da ray mey nga dala masa akwar ma da cakalamara ngada ndøhay nga Yesu da \*Jeruzelem. Ka da kamara anda yah ma løvtar ngada ndøhay daa \*mecømey-ray nga ndøhay nga Yesu da Galati may. <sup>2</sup> Fa luma ha, fa luma ha na, kwa waawa da wuzlah akwar nga ley dala daa dey masa anga ma høtar tøðe ta gødanj anga, nga cakala, amba da masa yah ma wusey la fa akwar na, ka cakalam dala mekele saba. <sup>3</sup> Yah ma wusey la fa akwar na, ya slørdana ndøhay masa akwar ma walamata nga handamara dala akwar a, a Jeruzelem la. Ya slørdana la ta leeter da har masa yah ma da wuzlalatara da ray dala ha. <sup>4</sup> Da maaya ya daw may na, ngene, ya diyam la bama daa slam a.

*Mey da ray cek masa Pawl ma da ka*

<sup>5</sup> Ya fa da daw aa hwayak nga Masadøwan amba ya cam ray ta ndøhay daa mecømey-ray hay nga Yesu fetede. Fa døða ha, ya wusey la fa akwar. <sup>6</sup> Ayøwa, da ya njeý la fa akwar nekøðey kwa, da ya ndøvda kiya nga memed la fa akwar kwa. Anda keðe, masa ya fa da mbøkdakwar cay na, ka jønmaye la kwa nga daw aa slam wura wura mekele. <sup>7</sup> Da ya wusey fa akwar amba ya njeý nekøðey gway na, ya wuðey ba. Ama da Bay Mahura ta tøða la na, ya wuðey nga njeý fa akwar ga.

<sup>8</sup> Ya njeɣ la da Efez haa kasl gwagway ɳga \*Pantekwat ma wuswa, <sup>9</sup> maja ya ta hɔteɣ har la ga ɳga key slɔra maaya ɳga Gazlavay, asaya, masa-gɔra hay ga fedɛ daha.

<sup>10</sup> Da Timawte ta wuseɣ la fa akwar na, tɔbmara maaya maaya, amba a njeɣ ta mandɔrzay daa dey ba, maja ɳga fa key slɔra ɳga Bay Mahura anda yah may. <sup>11</sup> Kwa ndaw da da rɔsa ba sɔlak. Jɔnmara amba a vɔhwa fa yah ta zazay, maja ya fa sɔkwta fedɛ, ɳga ta mɔlmanɳ hay mekele \*.

<sup>12</sup> Da ray mɔlma alɔkwa Apalaws na, ya ta kar ambahw la dey weewe, ya lɔvar, maaya na, a daw ta mɔlmanɳ hay mekele ma da diyam fa akwar, ama a wudɛɣ ɳga daw wure kedɛ ba sɔlak. Ama, da masa ta hɔteɣ har la na, a daw la.

### *Mey ɳga madagway-dakw*

<sup>13</sup> Ka da nam ɔar ba, njam maaya maaya daa cɔvedɔ ɳga Gazlavay, ka da zluram ba, kam gɔdanɳ. <sup>14</sup> Cek hay tabiya masa akwar ma kamata na, kamara ta mewudɛɣ-vaw.

<sup>15</sup> Mɔlma adaw hay, ka sɔrmara Estefanas ta ndɔhay da way ɳga, ba diya? Ata na, ndɔhay masa ɳgeeme ma tɔbmara meɣ ɳga Yesu \*Kɔriste daa hwayak ɳga Akay. Ta vɔldamara ray ata la ɳga jɔney ndɔhay ɳga Yesu. Ya kakwar ambahw, <sup>16</sup> ndɔhay anda ɳgene na, namatar ray. Asaya, namatar ray a ndɔhay ma kam slɔra bama ta ata.

<sup>17</sup> Ya faa sɔmey da ray ata Estefanas, Fartunatus leɳ Akaykus ma samawa fa yah. Masa yah ma hɔtatar na, anda ya hɔteɣ ɳgene na, akwar tabiya akwar. <sup>18</sup> Ta

---

16:8 16.8-9 SNM 19.8-10 16:10 16.10 Timawte: 4.17 \* 16:11 16.11 Ndɔhay mekele a wulkam na, meɣ Gɔrek a lɔvey: «maja ala ta mɔlmanɳ hay mekele fa sɔkwmara fedɛ.» 16:12 16.12 Apalaws: 1.12 16:13 16.13 15.38; Ps 31.25; Ef 6.10 16:14 16.14 8.1; Jan 13.34; Rm 13.8-10; 2Kwr 6.6; Gal 6.10; Ef 5.2 16:15 16.15 Rm 16.5; Estefanas: 1.16

dəkmaya mevel la anda ata ma dəkmakwar mevel may. Səkway nga ndəhay anda ngene na, həslmatar ray.

<sup>19</sup> Ndəhay nga Yesu daa mecəmey-ray hay daa slam hay mekele mekele daa hwayak nga Azi a camakwar har. Ata Akilas ta ngwas anga Pəriska †, lej ndəhay nga Yesu masa ma kusam da way ata na, a camakwar har maaya maaya ta mezəley nga Bay Mahura Yesu. <sup>20</sup> Ndəhay nga Yesu tabiya feđe, a camakwar har may. Akwar tabiya, cam har da wuzlah akwar cəpa pal pal, anda akwar məlman hay.

<sup>21</sup> *Yah, Pawl, ya cakwar har.* Ara yah ta har ađaw, ma wuzlalakwara mecey-har a keđe.

<sup>22</sup> Ndaw ma wuđa Bay Mahura ba na, anja Gazlavay nga nəsa. «Maranata.» Anja Bay aləkwa Mahura nga sawa.

<sup>23</sup> Anja maaya nga Bay aləkwa Mahura Yesu nga njeý ta akwar.

<sup>24</sup> Akwar ndəhay nga Yesu Kəriste, ya fa wuđkwar, akwar tabiya akwar.

---

16:18 16.18 Fəl 2.29; 1Tes 5.12 † 16:19 16.19 Pəriska: A zəlmara daa slam mekele Pəresil. Nəka SNM 18.2. 16:19 16.19 Rm 16.5; Azi: CWJ 1.4, 11 16:20 16.20 Rm 16.16 16:21 16.21 Gal 6.11; Kwa 4.18; 2Tes 3.17; Flm 19 16:22 16.22 Gal 1.8-9; CWJ 22.20; Maranata: Jud 14; CWJ 1.7 16:24 16.24 4.21; 2Kwr 2.4; 11.11; 12.15; Fəl 1.8; 2.17; 1Tes 2.8; 3.12; 2Tm 3.10; Flm 9

Mejəwey-mey Mawiya  
Mofu-Gudur: Mejəwey-mey Mawiya New Testament  
Le Nouveau Testament en langue Mofu-Gudur (Cameroun)

copyright © 2007 Wycliffe Bible Translators, Inc.

Language: (Mofu-Gudur)

Contributor: Aramaic Bible Translation, Inc.

All rights reserved.

2020-11-19

---

PDF generated using Haiola and XeLaTeX on 14 Jun 2022 from source files dated 24 Nov  
2021

2b021919-36cf-59da-a35f-10c5e5548811